

晚晴籟詩匯

第七册

晚晴簃詩匯卷十四目錄

申涵光 二十七首

張蓋 二十三首

趙湛 十一首

劉逢源 十九首

王餘佑 八首

張爾岐 六首

程先貞 五首

劉文炤 十首

杜依中 五首

李友太 二首

孫望雅 一首

孫博雅 一首

傅眉 四首

董樵 四首

李雍熙 三首

王星室 一首

韓田 一首

白孕彩 三首

王建常 一首

趙士喆 四首

張光啟 四首

焦復亨 一首

明倫彙編 家範典 卷一百一十五

王體健 一首

高鏞 一首

晚晴移詩匯卷十四

徐世昌

申涵光字孚孟一字和孟號鳧盟永年人貢生有聰山

詩集

張素存云君自髻鬣即嗜為詩吐納百氏不名一家而音節頓挫沈鬱激昂一以少陵為師其所以師少陵者悲愉吽嘯無一曲肖而非世俗掇拾字句以求形似者所可比也魏石生云鳧盟之於詩一以少陵為宗而沐浴於高岑王孟若李空同何大復亦兼采所長其他競如也詩話鳧盟性簡傲以詩名河朔間嘗游蘇門以弟子禮謁夏峯獲聞天人性命之旨遂不復為詩漁洋懷人絕句廣平申大今詞傑未識容顏眼便青遠寄新詩向隋苑懷人偏在竹西亭

歲晏

歲晏百物息草木隨風沙松柏慘不舒况彼園中花層陰
晝蕭條微霰時復加林中常鳴狐屋上常鳴鴉豈不思遠

游負手還吞嗟陽氣動飛灰枯荻漸萌芽嚴威蘊華滋深
藏古所嘉

荆吳隔大江風濤不可涉短衣凌荒岑挂槩撥寒月元雲
閉河梁故人書久絕日招誰家兒輕揚弄綺陌投我蛺蝶
羅繫以雙玉玦我畏不敢過中途自改轍弱草披澗陰梧
桐峙高闕本非同根生榮瘁應各別

亭亭西山雲萬仞青芙蓉下臨不測淵土有太古松松頂
巢黃鶴淵中藏蛟龍躡屐披雲根亂石翳蒼茸隔溪三五
人濯足吟疏風白髮好容顏無乃商山翁漢庭亦已出書
幣凋瀟蒙真隱自草木豈貪世上功落日凌紫煙揮手吾
焉從

匡廬吟問李饒州志清

汝從江右返正當秋雁分幾時離卻鄱陽水衣裘尙帶匡
山雲我聞匡山天下絕飛泉百丈吹瓊雪香鑪五老沒層
雲影入波濤峯勢折聞有陸羽井又有遠公臺李白讀書
心所好至今魂魄應常來我曾東入吳揚帆下西浙楊子
太湖水滿眼吳山北固皆邱垤十載匡廬幽夢結西江血
滿鄱湖熱兵戈遙隔子猷船汝若曾登可細說

邯鄲行

西風吹落葉颯颯邯鄲道邯鄲兵火後人家生白草我聞
邯鄲全盛時朱樓銀燭光琉璃趙女臨窗調寶瑟樓前走
馬黃金羈卽今富貴皆安在惟有西山青不改不見游俠
子白日報讐飲都市亦不見墟邊倡華袿鳳髻明月瑤舊
城寥落荆榛裏樓臺粉黛皆茫茫城邊過客飛黃土城上

明詩彙言附卷十四
憑臨日正午照眉池畔落寒鴉不信此地曾歌舞探穀沙
邱去不迴霸圖消歇更堪哀邯鄲之人思舊德至今猶上
武靈臺

春雪歌

北風昨夜吹林莽雪片朝飛大如掌南園老梅凍不開飢
鳥啄落青苔上破屋寒多午未餐擁衾對雪空長歎去歲
雨頻禾爛死冰消委巷生波瀾吳楚并乾江底坼北方翻
作蛟龍宅豪客椎牛晝殺人彎弓笑入長安陌長安畫閣
壓瓊瑜獵罷高懸金僕姑歌聲入夜華鐙暝不信人間有
餓夫

張覆輿自西山來

何事須城郭人間復見君全家依澗草短褐帶山雲薄俗

居難定忘形鹿可羣四方多戰伐羨爾未全聞

遣興

豈敢名高尙山園已定居數椽風雨外萬事死生餘避地
尋丹訣傳家有素書天寒松酒熟日日溷樵漁
小築容高卧荒林失曙更人從多難老心向遠天清野屋
懸魚笱霜灘落雁聲一年看又暮新月幾迴明

謁張尙書湛虛先生

結茅飛鳥上秋色滿懸壺白髮增幽事黃冠屈壯圖琴樽
山月好風雨老臣孤莫訝披雲至浮名此地無
不忘

江上前朝酒同人意不忘衣冠臨水榭煙雨下金閨入筓
龍鬚輒登盤佛手香歸來南北異生死各茫茫

旅食多歸夢庭幃正北懸重來輕齒髮千里入烽煙書畫
江城市弓刀塞草天至今明月夜無地拜啼鵲

雨後林慮道中早行

曉渡青泥坂秋花亂馬蹄不知山寺近漸覺遠村低萬事
驚鼙鼓孤雲入杖藜蘇門高卧處爲訪碧峯西

寶雞巷訪吳見末比部卽訂九日之游

卜宅依寒水朝回只閉關見君當落葉此地有空山雨歇
秋仍暎官貧老更閒登高何處好屨杖許追攀

登岱

殿閣盤空界鏡香出絳霄到門諸念絕終夜百靈朝石闥
馴雙虎天風落皂鵬玉漿如可待未覺沃州遙

西郊

風吹荻葉滿漁梁野菊乘秋亦暫香邊郡早寒沙漠漠水
村多雨月蒼蒼常持白羽尋雲壑敢羨華裾負草堂何事
暗蛩催鬢髮一年今已過重陽

寄宋吏部玉叔

風雨常懷宋玉悲嶽雲海樹遠離離春生太液魚龍嘯月
滿空陂雁鷺飢先輩風流成李賀同時歌詠附王維定知
脫畧能傾倒竹杖從爲汗漫期

無才

窗下平田細路分樵歌幾處遠猶聞濤聲夜落漳南樹山
色晴分冀北雲曲岸人家依紫蓼衡門客到煮青芹無才
合就窮途老車馬休驚白鷺羣

己丑生日

形跡卷言四十一
行歌何處問幽棲
溢口孤亭郡堞西
漸覺悲歡從俗懶
漫將懷抱向人低
驚猿莫訝頻移樹
羸馬猶能惜障泥
烽火近連冬未雪
每逢喧樂倍淒淒

靈巖寺

天畔靈巖已昔聞
石橋花雨正紛紛
楓林亂掩浮圖出
黛色遙從泰嶽分
古殿橫闌迷赤箭
秋泉帶葉下青雲
伊蒲會罷僧厨飯
倚杖看碑到日曛

雲外笙簧擁碧霞
游人爭看鐵袈裟
虛巖白映山南日
老菊黃垂洞口花
溪水過橋喧鶴鶴
松根出石走龍蛇
飛梯萬仞棲真地
可許尋源問鹿車

答人

日日秋陰命笋輿
故人天上落雙魚
荷花未老村醪熟
爲

道無閒作報書

黃花谷

竹杖尋源入上方
滿山槲葉晚蒼蒼
亂碑零落游人少
一道飛泉下夕陽

溪上

微霜昨夜下庭槐
水畔閒登萬里臺
兩岸蘆花飛白雪
午橋煙裏一舟來

燕京卽事

塞雲宮月遠蒼蒼
蕭后妝樓亦渺茫
四百餘年池水換
依然風動芰荷香

漢時秦原罷曉鐘
黃綃牙軸市塵封
畫圖往往多隆準
傳是先朝舊御容

汎舟明湖

女牆倒影下寒空
樹杪飛橋渡遠虹
厯下人家十萬戶
秋來俱在雁聲中

張蓋字覆輿永年人明諸生有張子詩選

詩話覆輿晚年遭逢國變自閉土室中雖妻子不得見以詩歌唱和為樂朱竹垞銘其墓云處士為詩哀憤過情恆自毀其稟或作狂草累百過至不可辨識乃已久之狂益甚竟死申鳧盟輯其遺稟僅得百篇刻之五言尤高簡

寄李十三郎君

主人十三齡天駒見龍脊絕塵瀟灑姿能解留人
客予時至平干復著游山屐足繭澀登途盜賊况充斥
踟躕數里間落日藏光赤投宿上君堂張燈照昏夕
蹇驢足芻茭老病須燔炙奴僕亦殷勤
自來掃牀席酌酒須玉瓶傾光泛

琥珀感情欲痛飲所恨胸腸窄恭聞爾先人遺汝登朝烏
汝兄善草聖海內稱名碩汝才駕徐陵準擬文章伯子有
兩男兒雞鶩空毛翮大兒倍汝年弧矢未能射小兒少汝
年祇備樵蘇役何以汝聰明日夜親圖籍老夫若汝年走
馬垂楊陌有時叢臺下醉舞揮金戟中歲好彈琴素琴橫
白石旁植一枝松今已高千尺忽忽鬢髮蒼自顧無良策
何處可容身避地來山澤結交無老少遭時有順逆長嘯
望停雲題詩謝疇昔

廣羊山訪殷伯巖不遇

爾從南方來衣裘帶江色舍舟入故山倦游聊憩息我住
君山南君住吾山北相隔十里雲欲見何由得今晨動幽
興獨訪漆泉側危橋上古寺徑轉長松直山僧五六人亭

月日身言 卷一 七
午會法食清齋到鄙夫益我筋生力老翁氣忽壯果腹取
巖巔初瞻意律崒絕頂無難陟荆蘿纔躋攀寸步成匍匐
天畔石房古仰望不可極山叟何時還再欲窺堂闕三步
一回頭皓鶴煙中翼

昭明臺呈襄陽諸公

楚郡蟠江腹危樓逼太清窗通高鳥過檻俯白雲生帝子
留文字羣公列治平我來戎馬際登眺獨含情

留郝元直

自得黃溝信常懷見汝期只愁相會少可道故鄉遲陪酒
鄰家夜彈棋日落時明朝各有事分手卽天涯

秋興

兔嶺邯鄲外羊祠楚甸中鄉心堪夜雨旅病苦秋風湖橘

垂丹實江蕉卷綠叢幽姿不可見倚樹獨書空

殷伯巖招同白涵三郝元直苑西柳霍亮雅申鳧盟
劉資深集飲

屢宿陶潛宅今來得數公竹斜鐙影外人醉雨聲中老惜
歡娛異交緣出處同病軀先就榻應恕鹿皮翁

渡沁水宿穆陵關

斜陽明晚渡倦馬踏寒雲岸動移舟影沙喧落雁羣山城
秋似畫水市暮多聞老客歸心急無眠到夜分

客歸

水濶荆門路君從此地歸雲山開暮雨舟楫帶斜暉計日
程將近從人道已非且尋嵇阮去竹裏閉柴扉

山居張湛虛司馬枉駕山人以予壺餐不備爲展待

因要遂臣先輩

康樂游山信先期報做廬宿春供野飯晨掃淨荒廚徑仄
猿相引雲深虎伴居果來尋牧子真氣拂林墟
山翁亦有意招引過鄰家繫馬驚林鳥催厨饌野麋一鐙
先好月雜果間疎花甕有蒲萄酒村醪不用賒
月出樓陰靜天晴露氣微蛩聲斷復響螢火起還飛隱吏
遺朱紱山光上白衣清談忘夜永相對兩無違

憶舊

城晚砧聲急庭深樹影寒孤檠憐自照明月憶同看旅日
憑詩過鄉愁仗酒寬秋天饒夢寐夜夜渡江干

山居秋夜同友人坐月

客宿楞伽宮秋深白露中雲歸千澗滿月出萬山空兵甲

何時息琴尊此夜同張華有寶劍醉拔舞雌雄

谿村卽事

幕懸樹中行潺湲石瀨清野花開間色秋鳥落寒聲家住
愚公谷書傳老伏生鄰人自來往日見不知名

偶成似湛虛先生

久客成親故居人識漸多自知林下路數向水邊過夕露
凋蒲柳秋風老芰荷病中曾見問詩思近如何

喜郭楚玉至

五載一相見乾坤幾變更亂離驚汝在衰病惜人情齒髮
前朝貌丹青後世名談詩悲喜外好雨向簷傾

登海光樓

城遠隨山勢樓高見海光池霜冬夏白岸樹古今蒼讓國

懷虞帝征苗憶禹王浮雲看變態倚檻獨傍徨

聞張扶隆將歸

詞客南遊未遣知遙傳消息倍多思江濤赴壑吹沙急海
日含山出霧遲桂檝尙留桃葉渡松醪已負菊花期陶潛
近有歸來興待汝從容一問之

寄題申處士鳧盟箕亭

負郭田疇水氣中隱君亭榭白雲通青連秔稻千村雨香
泛芙蓉萬里風夏簟涼侵高士卧新詩清絕老夫同欲持
百尺琅玕竹向爾漁磯作釣翁

答申鳧盟約遊隆慮

西南林壑動高興愛有山村間水村山入太行盤鳥道水
分瀑布下雲根得同鄭子耕巖谷何異龐公隱鹿門仗汝

遠尋先卜築願將白髮共朝昏

七里峽

朝下縣壺頂暮行寒峽中壺形猶迤邐峽勢已龍嵒豈假
隨刊力當知造化功水聲流太古石色聳遙空重碧涵砂
礫深紅綴蘚叢暗崖迴北雪高岫阻南風山鬼宜幽僻神
魚老混濛依稀聞唳鶴彷彿見奔狻聞道瞿塘好常思灑
瀕雄干戈妨厯覽舟楫廢疲癯此谷聊堪隱前山幸可通
杖藜五指外借騎廣陽東附葛緣明月披煙坐晚楓回瞻
長嘯處何異在崆峒

漫作

玉盤瀆墨可二斗高麗繭紙冰蠶紋醉來揮灑興不盡欲
上青天寫白雲

孟亭

不見當年孟浩然魚梁渡口問漁船巖扉松徑空搔首沙岸如霜月滿天

趙湛字秋水號石鷗永年人有玉暉堂橐

詩話漁洋謂申鳧盟稱詩廣平開河朔詩派其友雜澤殷岳伯巖永年張蓋覆輿曲周劉逢源津逮邯鄲趙湛秋水皆逸民也案秋水實永年人非邯鄲漁洋蓋誤記詩清圓朗潤與津逮詩相伯仲

省心吟

玉函藏寶鏡光瑩若冰晶三時不拂拭便見雲煙生撫躬問方寸百歲空營營五色亂我目六欲牽我情苟不自琢磨安得常清明芳架接前哲龜勉崇令名

博陸傾漢冊緯績方伊周不學慕厚勢帷闥生愆尤豈有廝養兒束髮皆封侯台光一夕沈樓觀成榛邱今古理不

遠慎以道自謀

上蔡有鄙夫困窮羨倉鼠挾策干祖龍感激去鄉里抵掌
取卿相乃欲易天子所謀一不臧凋零自茲始東門悔初
念機發不可止

溫清理亦常閱曾號佳嗣百行此其源立身首孝弟茲義
苟不充浮名盡糠粃試問平生心胡爲皆昧昧

曉登關山望六合有懷黃遜庵明府

山口掛殘月樹色曉青蒼登危陟層坂歷險凌崇岡力衰
五步歇僕夫相扶將下瞰同旅人偃僂行趨踰顧余頭白
翁驅策游何方故人有黃子綰綬宰江鄉疇昔枉尺書走
使過洛漳溫語慰衰朽冰雪灑肝腸吾里值歲儉盡室無
宿糧老妻裙不完稚子充糟糠苦被八口累奔迫道阻長

黃子敦古處不與俗士行車笠有前期久要應不忘

贈太平馬學博

名山不在高名泉不在深所貴清冷色玩之怡我心之子
山川秀冲懷寄遙岑六十困寒氈白首無知音丹室偶然
遇蘭雪生我襟高話對微雨如聽松間琴契合各有數傾
蓋比黃金

我友殷宗山疇昔宰濰水式廬得澹臺佩之等衡芷分手
三十秋逝波去若駛垂老感知遇淚下不能止流水與高
山古人復可起

貽我白雪篇蒼茫發瑤采傲若松與柏雪霜色無改捧讀
不忍釋浩淼望滄海緘之玉函中披閱對吉靄旦暮秋江
濱芙蓉共君採

武勝關

草店亂山口巖深隔暮曛
皇圖三楚盡列宿九何分控遠
容巴寇關貧減戍軍秋風南羽便寄謝洞庭雲

道經鳳陽

飛樓縹渺海雲孤山頂星壇定有無
不信青田占氣象還教赤縣變荒蕪
瑤臺歸鶴悲遼水玉寢啼鵲拜鼎湖
聞說梵宮遺寶衲月明珠樹少棲烏

訪張天池兼訊楊觀察筠湄

裴子巖邊新卜居六年烽火斷音書
相逢應訝形容老失路真慚義氣疏
戰伐何方尋樂土饑荒吾里漸邱墟
峴山若遇羊開府憶否漳南舊隱廬

劉逢源字資深號津逮曲周人貢生有積書巖詩學迂

軒橐

詩話津逮與申息盟諸人唱和時稱高士其詩功力頗深品格在大歷之間

雨餘

雨餘一杖輕林塘引秋步溪漲石梁平別尋花間路徑轉
岸稍頽邱壑莽回互奇石擁秋花寒苔蝕古樹孤亭不逢
人偶得閒中句石磴久徘徊林外山光暮

九日登赤壁

九日至黃州欣然獨西笑赤壁落吾手於焉恣游眺一杖
陵層崖劃然發長嘯把酒呼魚龍踞石登虎豹小亭遺像
在長髯側烏帽卓哉東坡叟煜煜神光照羣兒戲弄兵蟻
鬪何足道想公弔古心還爲後人弔鶴影落寒空笛聲來
遠棹杖策下荒岑江煙起漁竈

詠懷

少年不自量意氣何崢嶸思一吐奇懷歷抵漢公卿中歲
事乖違烽煙暗兩京遂戢飛揚志殊深林壑情家貧迫衣
食不敢薄躬耕頽然一野老井曰困柴荆每赴雞豚社閒
尋鷗鷺盟陋巷甘偃蹇聊以善自名

溪光

溪光明落日淡性與秋宜叢菊薰幽徑寒匏掛短籬泉聲
爭赴壑葉影半辭枝鄰叟閒相慰浮生莫浪悲

秋村卽事

夜來山雨過寒氣入秋衾野水多歸壑林禽有靜音簞瓢
無外慕鷗鷺識閒心久矣甘雲卧浮生任陸沈

訪友

子雲塵外宅花底出炊煙旋摘簷前果還烹雨後泉雞豚
侵虎落鷗鷺上漁船戰伐何曾見桃源又一天

村居秋懷卽事

空山寂寞野人家巷古溪深靜不譁屋角老槐飛敗葉庭
中寒蔓引秋瓜霏微菊畔茶煙冷宛轉橋頭竹徑斜晚有
鄰翁雞黍約一尊溪上醉秋霞

無端華髮滿秋簪四壁雲山響素琴何處寒花矜晚節幾
年風雨老文心香來始覺蘭當戶月到方知鶴在林杖履
荒原覓天地一溪松影隔雲岑

和秋水韻

自甘抱拙守東岡一卧雲林歲月長野水到門晴放棹博
山欹枕夜焚香松聲無賴驚幽夢花影多情戀夕陽牢落

壯心消欲盡愛聽童穉詠滄浪

己亥冬懷

寒裂冰紋響石渠滿天風雪困樵漁藏名何必逃吳市高
卧猶能讀漢書已向琴尊消歲月無勞鐘鼓饗爰居茅齋
土鏗炊煙冷委巷誰來長者車

短髮

短髮蕭蕭不受簪每思方外散幽襟行藏何必關人世歲
月無多閱古今秋漲有時侵舊路白雲常自滿荒岑浮名
不願傳都市肯向長安浪碎琴

薊門秋興

微霜昨夜下邊城小隊輕裝獵晚晴箭似餓鷗雙翼墮石
疑伏虎一軍驚桃花馬飾黃金勒竹葉醪傾白玉觥醉尉

日
月
余
言
日
一
三
三
灞亭誰敢問夜深毳帳打毬聲

無復熊羆守翠微行人駐馬立斜暉人間已見傳金碗篋裏徒驚舉玉衣雁掠荒雲啼隧道鼠緣古瓦下圍扉經途誰奏通天表淚溼龍髯願已違

秋日漫興

稍喜世緣貧日少何妨邱壑寄餘生漁樵堪作閒中計雞黍聊尋世外盟兩岸蓼花晴放棹一龕蕉雨夜譚兵牀頭龍劍時時吼五嶽胸中似未平

別墅留僧夜話

竹杖芒屨筍籜冠籬頭缺處望煙巒半生可惜貧中老萬事何當悟後看瓶粟無多憂鶴瘦春衣初試怯花寒無心收拾閒風月煨芋焚香對懶殘

郭泰

博帶雍容七尺身
遨遊郡國擅人倫
如何下士驚相慕
只倣先生折角巾

种放

賢母相將老一邱
石田茅屋豹林秋
昭文司諫新銜貴
爭似雲溪老醉侯

補鍋匠

高隱昔傳磨鏡客
奇蹤今見補鍋人
若將姓字留天地
雖作巢由亦外臣

山行

寂歷空山鹿豕蹤
石梁苔滑杖孤筇
岸花零落隨流去
秋到溪南第幾峯

王餘佑字介祺一字申之直隸新城人明諸生有五公

山人集

詩話五公山人尚氣節好談兵著有乾坤大略諸葛陣圖諸書受業於孫夏峯杜紫峯之門入國朝流寓獻縣主講獻陵書院與及門論詩謂詩本性情必以忠孝為根柢子美入蜀子瞻海外忠君愛國之念肫然於中觸景流連遂為詠歌嗟歎不已此蓋自道其意然詩亦多端其佳處不盡在此觀杜蘇全集自見山人本不以詩重四庫書日提要謂其詩文皆不入格考證尤疏山人蓋自有其卓卓足傳者實不以此與文人較短長也

雪後寄田治埏

冬深白雪寒山遠烏薪貴伊人寂不聞得無折膠畏凍雀
棲僵枝寒兔蹲蒼卉萬物正枯槁嶺梅獨香沸所以天地
心剝盡復當暨寄語拈花人笑閱嚴凝氣

步答魏澹園

平生豪宕意白髮作閒人倚馬心猶壯屠龍技已貧酒杯
妨病眼詩卷累餘身勗我真良藥躊躇動遠神

用寄陳藹公韻示文輔

後世人難問先憂計總疏已淪中下策空負短長書交自
分今古吾誰問毀譽壯心看漸冷且共老江漁

弔朱貞明

一生俠烈氣熱血沸重泉力屈空填海魂歸欲叫天淒風
悲馬鬣苦月冷漁船蘆荻蕭蕭處誰憑義士阡

過立節弔袁紫煙將軍

一世英雄氣蕭條何處歸龍精埋地血馬革繡衣空憶
頻陽卧難籌卽墨圍遙憑宿草墓雨淚不勝揮

偶句足成有懷山中諸友

雲樹千層水一灣幽人此際好閒閒釣磯坐去攜殘卷樵
斧腰來耐遠山甯子不離牛口下石生何事馬蹄閒總無
長統良田樂邱壑生涯足閉關

偶感

三徑荒蕪豈邃居鳥巢魚窟更安如逢人只合長緘口避
客終當諱讀書船入竹中聊斷問蘭生道上亦妨鋤從今
玩世休希阮一唱猖狂計尙疏

偶感

春來萬木綠芳齊多少遊人聽鳥啼可惜城南紅杏發無
人載酒上唐隄

張爾岐字稷若號蒿庵濟陽人諸生有蒿庵詩集

詩話崇德中師徇山左稷若尊人殉焉稷若殫心樸
學撰儀禮鄭注句讀根本儒先立言簡當旁及夏小

正弟子職老子諸書皆有注釋沈淪諸生間爲王哀不爲嵇紹終不欲自明亭林推爲獨精三禮卓然經師其歿又爲詩弔之日從此山東問三禮康成家法竟無傳其重之至矣

壬寅春訪元明先生張隱君歸賦

繡水雲湖間距城近十里爰有石隱人誅茅託於此我欲
訪幽蹤披衣凌晨起徐步乘春風雲樹互迤邐道旁問耕
夫云此草廬是榆柳翳柴扉竹石森階祀斯須先生出白
髮短覆耳骨趨更神完古意見冠被詢名各嗟訝入坐略
諾唯烹茗發清言紛綸具元理夕陽在樹杪欲去情不已
揮手尋歸途蒼茫暝色裏

列仙詩

紫庭夜降玉晨君面授靈威鳥跡文指示分明方悟得嵇
康未是解書人

一顆冰桃落漢家羣仙爭妬錦宮霞當時不信元君誑今日東風正著花

漢宮衰草夕陽寒淚滴銅人久不乾舉手摩挲相慰語海
癭生滅本漫漫

注老爭傳河上公文皇虛訪擬空同乘雲瞥地呈靈幻何
怪文成與少翁

送張非聞還里

生世苦違異退守詩書殘寥寥古人中默求心所安出語
遭疑訕孤蹤良獨難吾兄自逆旅坦然委肺肝片言質要
妙曲折頗有端視君方寄食殊不憂飢寒冥獲或自笑心
戰亦寡歡內勝足天機身窮中愈寬時月一過從開襟意
爲殫慮余搖異說發藥相劇鑽往往切余心慚汗同露溥

白璧陳座席自覺多垢癥相資八年餘如鏡正衣冠忽聞
當別去朝夕越河干北堂有慈命於理難盤桓惜此良友
遠致詞不覺繁願各勵終始莫變青與丹

程先貞字正夫德州人有海右陳人集

詩話正夫以大父蔭爲水曹郎方強仕卽謝歸明亡
不復出詩汲古起雅爲牧齋所稱詩家表章節烈爲
五言長篇孔雀東南已成科曰正夫火蓮一篇
聲調句格初不墨守舊蹊漁洋謂有逸氣信然

火蓮行

陵州有節婦阿桂身姓王厥父名會禮髫年訓義方出嫁
韓承業青衿白面郎伉儷如膠漆自比雙鴛鴦刺繡春宵
暝辟纊秋夜涼井臼躬操作顏色奉姑嫜名滿鄰人口賢
哉窈窕娘承業向彌留手自撫靈牀好往不須怖死者實
甯康平生託寸心賤妾敢遺忘不久卽追晤與君相扶將

既瞑一長慟七日絕水漿阿母勸之食未忍負高堂終不
御鹽醯朝夕惟淡湯開我東間閣倒篋復傾筐珍珠雜翡
翠羅列錦雲裳分遺諸妯娒庶幾永相望依依守素旒三
餐薦旨香卻略再拜跪齊眉進酒觴皈心佛位下喃喃達
五更或憫其愁苦或笑其癡狂夫人都不知塞耳去洋洋
荏苒日復月朽骨宜歸藏計期已迫促夜起辦嚴裝竹釵
麻作履斬衰稱體量懷探尺素書置在案中央擬題曰守
志斐然成篇章明鏡壓其上雙珠分兩旁出至室東隅露
地承天光藉用舊蘆席趺坐委經纒揮手謝家人不得作
驚惶屏氣靜俟之須臾烈火張自頂下及踵紅雲映寶妝
體如玉瓊瓏較比金鐵剛小院滿氤氳煙焰殊馥芳衣服
既淨盡蘆席乃不傷相界若蓮花又若觸琳瑯觀者千萬

眾稠疊成堵牆太子從南來五馬立徬徨亦有衛司馬牙
纛豎旗槍低頭各歎息匍匐救其喪火蓮席下土爭取療
災殃土到病卽愈此窟如池塘乃翁韓紳氏收骨入幽房
雙柩遂齊發合葬城東岡神宗戊子歲距今八十霜間從
好事者鄴架理縹緲得其手書讀纒纒萬言長非偈亦非
詩敘次頗周詳大抵謂吾心出入本何常一獲卽須鎖不
可使之颺幸無兒女累年已三十強信爲萬行母聊用挽
頽綱斯言類有道敢不拜其昌人生娶此妻何必貴姬姜
高冢今猶在連理樹成行魂兮風雨夜髣髴歸故鄉

顧亭林從大同來暫過東昌

一夕三年別疎燈話舊游長征還帶劍遠望欲登樓月落
青山夜雲迴紫塞秋故鄉何處是此地卽并州

吾道看如此天涯去住難班荆留款坐翦韭勸加餐暮雨吟蛩切秋風落雁寒仲連臺畔路明日又漫漫

還山

豈有移文向北山孤飛倦鳥自知還遠慚宏景無仙骨真覺維摩有病顏隱士新銜聊可署狂奴故態不須刪朝衫脫後身加健別有高堂舞袖嫵

送舍弟典返東蒙別業

蹇驢秋盡度荒原東下顛與有舊村流水斜通樵徑遠寒山萬木一柴門

劉文炤字雪舫宛平人有攬蕙堂偶存

詩話雪舫明孝純劉太后姪史稱太后家本海州後籍宛平魏叔子有贈北平劉雪舫序其為宛平人無疑靜志居詩話謂為任邱人誤也叔子稱其好學工詩其人燕有燕游草悲涼伉壯不忍多讀全集不可

見畿輔詩傳卷載其七律
十首蒼涼沈鬱不減李何

金陵懷古

天涯旅况又逢冬薄暮江風慘客容南渡君臣終遜位東
流波浪自朝宗干戈滿眼人將老喪亂經心酒不濃聞說
樓船催伐木何堪斧及六朝松

霜草芒屨訪舊京景陽回首淚縱橫埋金未必成秦厭銷
鐵安能禦晉兵自古山川難恃險從來花鳥易傷情南朝
過眼繁華盡倚杖長干看月明

客懷

建業荒城王氣銷逃名何地寄漁樵干戈夢裏懷三徑刀
尺聲中過六朝舊雨不來江路晚歸鴻信斷楚山遙孤鐙
此際堪愁絕獨立寒空夜寂寥

登雨花臺

黃葉蕭蕭眼倦開
北風吹客上高臺
千秋王氣朝雲散
萬里邊聲塞雁來
舊苑荒榛多牧馬
青山落日獨銜杯
不須更下新亭淚
晉代園陵已劫灰

同魏爾阜蔣前民登焦山

連朝阻雨瓜洲宿
雨霽同君共涉江
寒影一樓風色厲
驚濤兩岸客心降
懸崖樹老根全拔
廢苑鐘銷僧不撞
洞口至今留漢詔
高蹤千載歎無雙

稽山客懷

江東風景近如何
十里錢塘倚棹過
白髮每從愁裏盡
青山偏是客中多
攢宮草沒冬青死
禹廟碑傾古字磨
獨有若耶操畔女
秋來猶唱舊吳歌

泗州道上

極目離離土一邱
漢皇陵廟此山頭
宮雲有意終朝變
淮水無情逐夜流
湯沐昔年曾賜復
禾麻今日不完秋
疲驢踏遍殘陽外
煙樹蕭蕭動客愁

清河夜泊

孤舟離緒又清明
一挂蒲帆千里程
去住向誰商出處
飄零到我負生平
雲連海氣天無色
風鼓河流夜有聲
襆被春寒眠不穩
悽然雙淚落三更

大悲寺逢僧謝監

我來古寺暗銷魂
瓦礫盈階一徑存
僅有爐煙凝白晝
絕無鐘鼓課黃昏
頽垣雨洗毘盧面
蔓草塵封丈門老
監逢人蕭索盡
殷勤垂淚話開元

一自居庸賊騎來禁城宮闕望烽開侍中早棄司農印監
視原非戡亂才傳詔亦曾趨暖殿佩刀無計禦平臺如今
頭白何人問風雨柴門永夜哀

杜依中字遯公號致虛靜海人明諸生順治間以宿儒

高行薦不應有雨花詩集

詩話遯公當崇禎叩闕獻十七策懷宗歎異署紙尾
曰賈陸重生以此名震天下熊次侯謂遯公不獨以
詩名余造其廬輒作隆中之想吳次尾
曰讀遯公詩知北地之才不獨崆峒也

遊華藏菴

百年塵劫裏過眼一風燈解脫人皆佛清閒我亦僧升沈
原有故夢覺果何憑借得蒲團力消磨障幾層

舟次河北自飲

好月隨舟轉相看醉影斜雄心非藉酒清淚豈聞笳城廢

連年水民荒何處家同人各努力莫待鬢毛華

偶成

窮有千年恨詩無一字工心存生死外身老亂離中劍氣
冲星動琴聲帶月空交游零落盡賴得夢魂通

夏日村居

今古紛紜未易評松間石上暫移情驅愁任我排棊陣破
恨同人共酒兵新法已經殘海內清談自是誤蒼生近來
司馬多征戰曾否當年細柳營

和黃石齋

一片荒涼萬里沙詩書誰是鄴侯家空知民困黃河急愁
看天文北斗斜雲暗深山龍喚雨香來古寺鹿銜花當前
過去渾如夢半榻松風聽法華

李友太字仲白號大拙天津人

詩話仲白當鼎革時年甫十三自號逸民隱於黃冠性迂介以禮自繩跬步不苟顧嗜古若癖凡篆籀分隸碑碣鼎彝書畫之屬一見能別其真贋摩挲摩挲品題終日不去手工畫詩亦雋逸可喜

賞花作

化工生一花結構殊苦辛自跌到須辦累積窮微塵譬之人百骸闕一非完人一朝顏色萎墮落吹續紛生之必一年敗之無半旬我故特愛惜以答造化勤換花試改插又是花一身

讀書弔古人我不能問字著書贈後人我不能執藝徬徨兩處心寂寞一生志不如來飲酒看花百日醉一花纔爛漫俗眼便驚異那知後花榮初花積憔悴人人作佳傳竹書不勝記人人要易名柳下不勝諡花亦猶人耳久開不

如墜

孫望雅字君儼號臞仙容城人有得閒人集

詩話臞仙夏峯子詩多作理語

辭墓

巾車頻促去他鄉臨路悽其拜墓傍我奉嚴親天外去諸

孫應解辦蒸嘗

孫博雅字君儔輝縣人有約齋集

詩話君儔夏峯第四子事母至孝夏峯春秋高偕兄弟朝夕侍夜即卧榻前未嘗少離夏峯晚年重聽弟子問難藉君儔以達既卒居喪盡禮弟韻雅坐事繫刑部獄君儔往來省視閱四年獄未解竟以勞瘵卒

白雲莊懷前御史温源

漳南才士共知聞話到當年涕淚殷解綬懶聽西掖漏浮家愛種北山雲牀頭金盡仍留客笛裏聲悲忽憶君最是

荒園能觸恨獨吟遺句弔斜曛

傅眉字壽髦陽曲人有我詩豪

詩話壽髦青主子青主抗節不出壽髦躬耕以養青
主喜苦酒號老槃禪壽髦因號小槃禪青主出游合
壽髦將車夜宿村店篝燈讀書旦必成誦乃行詩附
霜紅龕集後青主舉鴻博堅卧不入試時壽髦已前
卒矣

雜詠

駑馬喜在後惡馬喜在先惡馬當用轡駑馬當用鞭燕雀
起道傍駑駘不肯前狡憤復喘汗盡日勞鞍韉良馬心膽
定千里咫尺間飢不食惡草渴不飲濁泉被甲盤蟻封注
波帶囊韉主人苟卓犖筋骨安足憐鐵騎滿原野一匹攻
中堅旌旗爲之靡壘壁隨周旋斬得大將頭戰鼓聲闐闐
沙場塵土歇雄心仍九邊

秋色

秋色在村外柴門久汨沒邱壑雲無窮半晴山雨歇木葉
填風煙雁底見微月寒蕪礎杵疏草蟲因間發

崛巘山寺門外

頽坐不暇語第取酒盞斟神氣稍爲接幽悅與我尋側睇
寺西巖厯落紅來禽高松蔽晴日薄雨蒙深林松身時反
側透亮見日沉飄渺卷紫縠飛傾融青金綠霧忽然過西
南留一岑當其希微間遂能合冥心

燕

春風吹斷紫蒲茸銜入盧家畫閣中只許游絲飛院落不
容柳絮近簾櫳奈何蛺蝶彈輕粉忽略桃花撲老紅收拾
香泥勞苦罷鏡臺偷照玉蟠龍

董樵初名震起字鷲谷號東湖萊陽人有南游岱游賈

游入山燕臺還山耦耕堂諸詩

詩話東湖雅志林泉慕古人採薪牧豕因更其名并以爲字亂後居文登海濱日荷薪入市易米不使人知其居處後與趙伯濬同隱成山姜如須顏其廬曰耦耕堂

還山至雲門

煙覆平林霜樹紅羣山中豁曲溪通園蔬已見連荒草籬菊還應炫晚叢一蹇江山新句在三秋風雨敞廬空倦游漸識閒居好試拂塵衣倚碧桐

初春過宋伊水次見贈韻

五嶽終難竟蹉跎豈漫游家居如旅夢春雨似深秋樽冷山雲外潮寒島石頭與君忘世故正好此淹留

秋日同宋玉鄉曲武英飲花石峯

海色當秋碧潮聲入午平一尊黃葉落萬里暮雲生衰老
思前事豪華變世情溪山獨不改仍是舊逢迎

游禪覺寺

策杖尋幽徑轉深禪關春意問啼禽勞人山色偏多怨留
客溪聲似有心掃石爭題苔斷壁傾樽直待月穿林疏狂
到處堪存跡明日重來過北岑

李雍熙字淦秋長山人諸生有翠巖偶集

詩話淦秋又號陸沈子卒於康熙戊申鼎革時年四十有一避地不出漁洋稱其詩古澹閑遠有陶令風

古詩

我生豈無涯茫茫眾人後達觀恨不早歲月若甕漏晚年
始愛道水火自相妬所憂精力衰大藥終未就入山雖不
深已足謝塵垢竹扉日夜開白雲入襟袖時有道人來金

經親授受讀之苦不悟沈思使人瘦一朝心爲開如月過
巖竇妙理清可悅谷神儼欲覲從茲剖昏瞶長願絕羣謬
萬劫有時盡至道莫能舊

白雲磻

司寇兄別墅

長白山中好崖谷翠飛巖高削蒼玉我來結茆卧其下老
樹當門一溪綠吾家康樂真絕塵夙昔本是青雲人偶然
高躅愛幽獨白雲澗北卜居新野徑紆迴抱丹嶂草閣茆
檐勢相向細雨春花兩蠟屐落日秋風一藤杖相過相對
每經時幽意但有閒雲知青林夜黑兀然坐玉液黃芽流
口脂我無靈藥身轉老欲鍊大還苦不早如君仙骨自天
生肯使容顏就枯槁何日丹成謝世情雲車風馬來相迎
我乘白鹿君黃鶴共向三山頂上行

過柳泉寺

雙樹開精舍門依曲水傍溪清石骨瘦山靜鳥聲長佛日
迎金鏡迷津渡石梁風塵不到處此地足羲皇

王星室字營若號半霞信陽人明諸生有強裁篇南游
草北游草青箱羣玉

送野菴南行參訪

與君分手際是我斷腸時溪碧水聲咽柳青風色悲片帆
煙上轉孤影月中隨一衲餘無累飄然任所之

韓田字耕良大興人

詩話耕良與弟畱石耕皆
貞肥遜之節隱居不仕

卓龍文招飲誌別

客趁東風今日行花間疏雨暮春情酒因分手難成醉琴

對離人別有聲何處銷魂鶯復囀一時和淚句還成遙遙
水驛山村路煙樹帆檣送去程

白孕彩字居實平定人明諸生有測魚集

詩話居實爲明諸生鼎革後棄舉子業居測魚村行吟澤畔時爲詩以自娛悲歌慷慨藉以見其懷抱

杏薄

杏薄作瓜架撐撐兩相宜彼無支蔓苦此無纏束辭雖經
惡風雨愈信相扶持瓜老充作薪勝燃溼花枝

誦山鬼

不知身是鬼道路一何幽芳草爲誰折靈修獨留死生
長夜恨風雨滿山愁有字還應泣無君甯弗憂

雪夜歸卽事

登臺作賦事成空閉肆圍碁技未雄天連白色疏星澹狹

巷無人一火紅

王建常字仲復號復齋朝邑人有復齋稟

詩話復齋為蓋甫侍郎之宗子侍郎在萬厯間爭挺擊之獄侃侃有直聲至天啟中死於閹禍復齋入國朝隱居不仕專治程朱之學粹然儒者鄉里矜式

斗室吟

作室大於斗棲遲亦自如不聞今世事但讀古人書有定
千情約無營一榻餘閒中時俯仰天地在吾廬

趙士喆字伯濬掖縣人有觀物齋集

詩話伯濬明季諸生倡山左大社與復社遙應嘗欲上書論軍事陳啟新以言進恥與之伍遂不果明亡隱成山松椒去家五
百里終身不一至

遼宮詞

女伴從軍萬里還自言會到玉門關赫連臺上秋雲捲遙

見河流入斷山

八月巫閭草半枯繡簾霜重一燈孤人生失意無南北笑

捲琵琶出塞圖

身似風前旅雁孤夜來猶自夢宣呼受降城上如霜月照

見行營寶帳無

大梁清禁隔蓬瀛仙眷何來五國城共矢餘年持苦行漢

宮環佩乞來生

張光啟字元明章邱人明諸生有張仲子詩

詩話元明隱居白雲湖上闢圃題曰省園蒔花樹足
不履城市年八十餘漁洋為刪定其詩題其後日
君家郎中泊何似郎官湖雲氣流銀浦人家在玉壺
林園交水石煙火出菰蘆他日遺民錄千秋道不孤
郎中泊湖
別名也

同侯夷門山人村外散懷

放腳荒郊外，欹斜憩夕陰。
漸看雲影遠，久坐草痕深。
紅樹多遮寺，青山半出林。
與君今日好，搔首共長吟。

獨坐

明月滿林間，卻坐無月處。
林影遠參差，夜深不知去。

池上

倚杖池邊立，西風荷柄斜。
眼明秋水外，又放一枝花。

對菊

種菊叢叢傍石根，凌晨坐卧近黃昏。
沽來新釀經秋醉，開盡寒花未出門。

焦復亨字陽長登封人

詩話陽長在明季有欲以隱逸薦者，力辭不赴。入國朝，遊山水，以詩歌文辭自娛。自署曰箕穎外臣，終不復出。

訪僧少林不遇

坐破團蒲記釋家參師底事去天涯雲開少室峯銜月路
繞黃河岸走沙東土問經空五蘊南宗聽講悟三車石幢
舊在無人禮落日寒林噪暮鴉

王體健字清有明諸生曲周人有讀騷齋詩集

詩話清有遺亂以什伍法部勒鄉里收守望之助入
國朝棄舉子業從夏峯游講性命之學詩宗元白有
吟風弄月之趣

和陶飲酒

千載仰高風常懷郭有道託志苟無欺窮困何辭老自幼
寡歡諧因之就枯槁不知與捷足相視孰為好我聞古人
言人生各有寶仲子匪能廉猶當推物表

高鏞字薦馨清苑人有淵穎集

詩話薦馨亦夏峯弟子居白洋淀側自號蘆中人好游名山水得句必手鐫之嘗游林慮陟其巔聞峯下耕者喧呼回視來路乃知衝虎過也有義烈編紀甲申保定陷賊時死事諸君書數襄陽詩多獨造語

題楊生壁

溪山無俗情雲夢深昏曉歸訪素心人路闒光已杳看煙
投一林霜滿孤村小鐙火夜方靜清言佐佳醪淡月影沈
沈衡宇幽花繞

春愁曲

涇煙柳岸隔蘭若迴塘淡白春漠漠寒姿晚態小窗閒梅
風吹動春衫薄鷗翻流浪點青渠綠房幽韻耐攤書雲北
雲南牽不斷長眉愁結懸如綫

晚晴移詩匯卷十四終

晚晴籜詩匯卷十五目錄

邢昉 三十七首

金俊明 五首

徐波 七首

歸莊 二首

馮舒 五首

馮班 十八首

朱鶴齡 十四首

潘耒 十四首

任源祥 六首

顧祖禹 四首

俞南史 三首

王澐 十一首

呼谷 十一首

潘陸 二首

冷士媚 三首

郭開泰 三首

韓洽 二首

錢曾 一首

晚晴移詩匯卷十五

徐世昌

邢昉字孟貞一字石湖高澹人明諸生有宛游草石白

集

詩話陳伯璣云孟貞詩無一暢懷語讀之令人增感
施愚山謂其詩清超無纖埃池北偶談云順治辛丑
李退庵過揚州余造謁舟中因論近日布衣詩余舉
程嘉燧吳兆驚退庵云終須還他邢昉傾倒如此可
以知其詩矣

游宗遠明瑟園登池上閣

春水浮亂柳野色明郊扉榜舟適至門落花正霏霏雨後
罕人跡泉石皆芳菲因登池上閣四顧延清暉君辭公府
辟了知世事非荷葉始覆水釣竿已在磯嘹唳天邊鳥徘
徊故退飛

登天馬山絕頂

紆路行山阿舍楫趨遙巘陟險三四盤雲巒鬱邈緬九峯
若在掌一一皆可辨物態漸以繁新林各舒卷振衣厯危
磴盤石忻屢踐乍休殊未厭莓苔不暇選攀躋方自茲中
情亦已展

翠微接雲氣孤塔標雲根仰觀有突兀始失中峯尊亦有
老子宮寂寞清淨源夙駕此山麓道經平原村斯人雖千
載江海存邱樊何況盼睐間芳草盈衡門獨鶴下煙際清
音哀心魂

海上多靈峯茲邱亦其亞林嶺互出沒溟色涵變化絕頂
豈不峻飛鳥已在下緬思千將鑄歎息夫差霸東望范蠡
湖瀰瀰向雲瀉古人何雄哉揮淚想逸駕來者有同心深

期勿相訝

廣福寺晚望

蘭若緬一溪青松蔽廣澤石橋暝可渡練湖了不隔水光
動衣帶蒼綠間眾色我鄉亦如此鳧鷖慮相識望望一舟
遠煙中渺河適

印度在禪河菴與予寺舍相距五里紀事

結伴先結懶買山先買寺東西不可料五六年間事朝旭
開遠光松筠一步地與君隔一河誰是王居士菴以何爲
名宛有伊人意枕邊衣帶水澹澹涵一簣比我牀前綠清
幽乃不啻磬聲浮水上此境安能覲

古樹三四圍清陰剛覆屋晴雨相代間葱菁壓羣木我友
與我鄰幽然隔蒼綠登陟頗無阻往還逕當熟杳杳數旬

內至今虛一宿當密意反疏以此成幽躅盼君笋出土淪
之飽我腹斯時欲往情較深于看竹

別家

少不務稼穡與世苦枘鑿年長無故業好文成拓落三載
適越郊春風長靡藿江流搖碧絲山株亂紅萼荏苒東南
征淥水鑿城郭別家歎方起撫穉情彌弱名嶠夙所尙田
園安可薄海上當寄書坐待西風鶚

寺中偶述

離家百務止動息頗無礙力作漸不稀近寺驚僧輩覩此
眾人勞省躬日至再新麥僅兩畦信至勸歸刈喜霽昨意
真身動如一債汗漫理不飽一往有微賴
穰穰非我情崩迫亦時有自此數旬內安閒庶無負湖中

鳥若帆恍惚過眼後寓目盡冥曠日得計所受自知關福
力無福焉敢狃惟有常忍飢不爲神所咎

觀太子少保左公遺集作歌贈子直兄弟

熹宗御宇凡七載封狐虺蝮蟠天關錦衣狂狴鬼夜哭忠
臣之血何斑斑此時世路真坎坷大獄株連縉紳禍四海
奔波屬魏崔十年揮淚哀楊左左公蹇蹇龍飛前隻手取
日升虞淵大功久已在社稷巨姦側目來鷹鷂九關虎豹
聲闐闐左公背裂呼蒼天蝮蛇爭螫禍機發公也衣褐歸
園田羣兇嗜嗜牙爲磨檻車轟轟渡黃河紫衣校尉稱勅
使皖公山下愁風波詔書讀罷著囚服傾城觀者吞聲哭
捐糜安恤具五刑囊頭且復關三木幾日陰霾暗城闕長
安市中風拔屋地震怒公殞命學士朝中皆魏姓豎子

甯堪玷太阿眞人已出懸天鏡盡驅魑魅掃氛祲垂衣手
握河魁柄公於是日蒙新典天書惻怛孤忠顯卽今慷慨
觀遺文龍螭五色何繽紛諸郎才器如天馬奔騰絕景仍
閒雅胸有至痛不敢言血淚哀哀向人瀉相將躑躅辭鄉
邑江上流離空四壁公侯必復理有之甘肥不御情尤裂
闕禍已熄更何論當時羽翼還雲屯况復天網亦疏濶此
曹玉食開朱門機深竊恐能飛翻嗚呼封狐雖死多子孫
安得努力一往呼天閻

同龍友石門洞觀瀑布歌

謝公昔爲永嘉守永嘉山水世無有朝登綠嶂興未已暮
踏孤嶼徘徊久惠連始入西池夢斤斧還搜石門洞闌寂
初從兕虎游幽閒忽聽鳴琴唳亂山夾岸清溪奔雙峯對

起開一門入門曲屈盡奇奧
豁訝古洞搖心魂巖上瀑流
白雲舞乍飛疑雪更疑霧
一道飄搖落千尺銀河正練何
足數飛流直下聲淅瀝登潭孤石相戛擊
隨風散漫入林壑併作寒煙潤蒼壁
摩崖字畫紛朦朧賦詠無如天寶工
漫游已鑄晁美叔避暑復勒蘇才翁
我亦清夏來絕境瀑雪潭光兩相映
掛席仍懸碧海心捫羅已得青田令
古人沒後空流水仙吏愛奇數過此
絕頂相看一惘然裹糧策杖從茲始

東湖樵夫歌

石子岡前雨蕭蕭古木落葉凌風颺
侍中碧血今猶在荒祠白日鳴鴟梟
于役來作東甌客父老告我東湖樵
東湖樵夫爲誰子負薪來往東湖汜
朝廷不守金川門野夫合

逝東湖水樵夫樵夫眞丈夫一死奚足更踟躕我向東湖
轉惆悵嗚呼獨不聞雪菴和尚補鍋匠

紫陽院

曾聞丁令威化鶴一來歸翠竹生庭院青雲滿洞扉何人
能獨往有鳥尙孤飛我欲尋遺蛻因之採蕨薇

寄涇上黃心甫

白露泣秋草涼風吹已淒平居滄海上消息澱湖西落木
轉惆悵微波各解攜一川猶可泝未遠伯鸞溪

同弱翁登華蓋山資福寺

山路日日霽已知秋色微薄雲歸嶺去落葉到江飛靈蹟
何時闕故人此會稀下方城郭裏秋望入雲扉

至靈谷寺簡張觀生

秋在何方見此間入門秋色引心閒偏因失路能游寺每
不逢人獨看山澗遇泉枯猶汨汨松當颺發盡潺潺爲詢
屢宿山中客幾夜濤聲共一關

梅惠連出家自黃州來住寶林菴賦贈

微官曾似南昌尉一鉢三年寄一峯却向青山成遠別獨
餘黃面到相逢謾從出世歌衰鳳且與閒潭制毒龍回首
楚雲猶有憶寒溪竹屋定時鐘

酬蔣冷生過訪鳳游寺覽古之作

路入青林折數盤君行訪古一漫漫荒臺空自連雲樹白
浪曾聞到瓦官雨色乍開江岫迴鶯聲欲罷午鐘殘豫愁
歸棹楓初赤却向丹陽古渡看

雨中過文丞相祠題浩然樓

高樓獨上已淒淒
 雨色寒生大海西
 潮擁綠江新漲水
 碑殘少保舊時題
 楚囚辛苦傷羅雉
 漢節歸來怨乳羝
 墮淚欲陳蘋藻薦
 荒堦寂寂數鳩唳

信公江心寺詩云羝為虎頭非貴相豈圖羝乳有歸

六月十四夜月泊江心寺謁文信公祠

江亭孤嶼鬱峨峨
 丞相祠前起白波
 樹色半隨沙鳥沒
 潮聲遠送海雲多
 千秋馬角悲三戶
 一夕旄頭落五坡
 憶昔枕戈揮淚處
 月明無奈溼衣何

從濟生菴至烏龍潭憇潭上

微風吹林氣境愜
 無深淺落日瀉潭影
 臨流恣遐眄灌木
 澄漣漪水容紛漾
 演人煙雖密邇頗不聞
 雞犬宛宛舊行跡
 十載一來踐惜無幽人
 廬蒿逕為子翦

十五夜元長歸翼臺望月

落日臨高臺夕煙散叢樾山際滅微靄林端露圓月遙峯
水上青銀漢久已沒桂魄耿寒空幽光鑒毛髮憶昔此佳
賞經年限吳越世事竟倉皇迴思成恍惚倚檻俯平野悲
風千里發惆悵哀江頭黯黯驚人骨

初冬過印度山居

林空苔徑淺殘葉猶在樹杲杲日出微披榛得樵路睽離
越寒暑容色各驚顧我疑子更衰子歎我非故所求在衣
食屢別寡懽聚有酒幾共斟無生良足慕冥心投寂樂積
想曠幽素寒溪更相送汨汨流泉注

六月雨涼憶去年避暑高座寺介立上人院因以寄

懷

明詩余言圖卷一三
季夏盛炎節多雨變涼候繁柯滯層陰衣袂衛形瘦隔歲
南朝寺竹林敞晴晝虛窗度澗羽元偈咨神秀別來運忽
周念注迹如觀石上閒清颺煙中翳遙岫遠懷清淨子籬
扉復誰扣

讀祖心再變紀漫述五十韻

惟歲昨在申九州始破碎舊京雖一隅形勢東南會我皇
秉圭鬯雨泣面如醜臣民盡驚呼少康真可配史公踐台
斗心赤當時最靈臺占紫氣恍惚嘉祥屆亡何變氛祲太
白垂天戒宵光晝炯炯百日猶未退咄哉夜郎人小器自
矜大入手事擠排持權誇擁戴朝廷一李綱不容密勿內
猘猶本在野抵死呼朋類赫赫先帝書翻案神靈嘅誼士
惜繁纓兇黨蒙冠帶從此問王綱解散隨塵壙貂蟬併饜

斧顛倒弄機械人心二豎灰世事長江敗泊乎皇輿播臨
軒會召對出奔忽異道此事令人怪得非靴中刀凜凜惡
姦檜所恨喪亂朝不少共驩鞏城頭豎降旗城下迎王旆
白頭宗伯老作事彌狡獪捧獻出英皇箋記稱再拜皇天
生此物其肉安足喂養士三百年豈料成狼狽幸有兩尙
書臣節堂堂在又有楊中丞甘死如飲齧嗚呼黃祠部刀
鋸何耿介郎吏及韋布一二更奇快吁嗟郡國英螳臂堪
一喙宣歙始發難戰血塗草萊麻生怒衝髮氣作長虹掛
松林戰尤苦婺女兵終潰吳子要離烈張朱俱慷慨我悲
黃相國絕食經顛沛海上王將軍就死跡逾邁此紀乙至
丙大書得梗概正氣苟勿渝細不遺鬅髻倘非斯人儔乾
坤眞憤憤大師南海秀簷立風塵外辛苦事掇拾微辭綴

叢蒼毛錐逐行脚蠅頭裝布袋前日城門過禍機發逅避
命危瀕伏鑕鞫苦屢加欽良以筆削勞幾落游魂隊諸方
尙雲擾瀕洞勢未殺雖然忧網羅慎勿罷紀載伊昔鄭億
翁著書至元代出土十載前金石何曾壞

山居偶興

首夏氣始燠喬木紛蔥蒨碧草露偏滋朱花晚猶絢荆扉
寂無喧卧起臨書卷窗外鳴嚶嚶新鶯歛不見時睇遠山
雲卷舒日千變夙昔安可懷忽復傷流電

神鴉歎

富池驛邊日欲西甘甯廟前煙欲迷雙竿半折廟門壞神
鴉散盡風淒淒風捲長波舟去急羣鴉飛上檣頭立送客
繇來懽客心舟上叫舞拋餘粒估船斷絕古祠荒無復醜

酒劄牛羊江黃何歲來盜賊從此神鴉稀食肉神鴉有神
長忍飢不向江灘啄人骨

楚江雁

江南八月蒲稗黃天邊雁叫煙蒼蒼歷落沙頭併水際三
三五五分成行當時見雁心悽惻本爲思家歎離隔如今
繫艇武昌城始知身是江南客木葉蕭蕭下漢川參差鴻
雁忽聯翩白雲洲上疏還密黃鵠磯頭斷復連河口雲深
迷楚樹分行作隊紛無數聞道瀟湘菰米多天寒更向瀟
湘去

故宮燕

君不見故宮燕春雨秋風幾回轉宮中風雨長蓬蒿飛入
宮牆繞虛殿穿簾度閣羽差池盡日呢喃人未知柳綠乍

唧千尺絮花開仍拂萬年枝玉堦寂寞罨冷畫棟差池
春燕影歲歲營巢竟不成春來秋去誰曾省可憐此度秋
風早整頓毛衣猶自好裴徊欲別未央宮萬戶千門忽如
掃鐘簾何年去洛陽仙人辭漢淚成行最苦西飛雙燕子
回頭不見舊宮牆

烏嚙金井桐嚙聲易鳴咽未若向西風傷心故宮燕白門
燕子去秋風社日年年無不同惟有曾棲青瓊闥欲去未
去悲西宮卻憶西宮前歲築禁籞勾陳俄彷彿不道君王
事卧薪頗聞將作誇神木一月宮前纔列仗翠華西去塵
飄颺虛殿無人燕子來三春對語雕梁上轉眼誰知事更
非雕梁藻井似蓬飛明歲壞垣春草裏茫茫何處問烏衣

酬葛元士

十載一握手憐予今白頭春風兩相惜縞帶已生愁細草
搖南浦輕雲繞北樓非君歌古調何以慰離憂

贈祖心上人

曠然攜一笠萬里到人間吳越峰邊過羅浮夢裏還漫游
逢世改因亂未身閒十月梅花發心悲似故山

送翁壽如之揚州

行李遲明發渡江何日歸秋風吹去路水色上征衣戰罷
城池在潮生海日微君看稻梁雁一一盡南飛

虎邱寺

玲瓏山翠幾沾衣夏木千章總十圍一自王郎開梵剎盡
令江影入巖扉闔閭葬後山長在范蠡歸時姓已非千古
卻疑沈劍處如何不見二龍飛

游興國寺

沔口孤城夕照中，偶披榛草問禪宮。
客來樹下看駝迹，鳥去堦前避馬通。
跌石尚存新記改，經廚已破舊房空。
當年大別銘方丈，此地人傳蘇長公。

和祖心上人游城南謁方正學先生祠

寂寂荒祠野靄昏，蕭蕭殘碣倚松根。
金川門又成亡國石，子岡偏欲斷魂昔。
日麻衣慚叔父，于今青草失王孫。
廢興自古須臾事，獨有先生戀主恩。

金俊明初名袞，字九章，更名後字孝章，號耿庵，吳縣人。

明諸生有退量稟

詩話孝章吳中高士詩書畫皆絕俗墨梅尤工斟酌繁簡別成雅構卒於康熙乙卯年七十有四漁洋有詩云維摩丈室幾黃昏春草閒房日閉門成佛生天兩何處暗香疏影為招魂當年五字寫柴桑文寄孤

山世外香一幅生綃千載意也應配
食水仙王因畫感舊其傾倒至矣

孫銘嘗墨蘭歌

幽人歲晏松柏林愁雲黯淡凝寒陰蒼梧斑竹若在眼元
圃瓊枝無復春王香隱谷久寂寞眾芳蕪穢傷人心援琴
一鼓三歎息湘水浩浩空霑襟有美孫卿芳竟體讀騷望
古晞良辰遨遊結客愛奇士一往懷抱含高深古來賢豪
多道藝悟餘游戲皆絕倫墨波流霏接沅澧筆區滋畹花
繽紛指端拂舞真貌出鞭笞風雨何精神憐君持贈滿冰
繭珍踰端綺雙南金言忘交澹識君旨芳菲襲目遺愁辛
聞君劍術尤莫比壯志俯屈同風塵獨留紆鬱寓染翰俗
外賞激誰知音我亦沈冥舊皋羽三歲菱約桐江潯何當
抽怨向白日交佩相羊情質申徒然霜霰厲叢薄天地豈

應終不仁憶翁孤露曠相感本穴空根悲至今

和致一韻

若木甯忘拂羲和底易傾百年如此日孤抱欲誰明野暮
愁風色湖寒斷雁聲可堪良友共衰老慰吾情

寄劉廣文欽爾

泛泛狎羣鳧流年又幾徂命將時大謬星與客同孤澤國
仍飄泊鄉書近有無轉羞松雪子空作水村圖

清明日同逖兒作

頻年羈旅向風塵尙憶嘉名在此辰四海兵疲悲戰燧千
家鬼餒嘯陰燐垂垂酒旆旗亭雨寂寂花泥馬廐春強把
一尊那得盡石泉槐火爲誰新

讀史

丹穴傳訾世莫爭用財爲衛守能貞祖龍勢力傾天下猶
築高臺禮婦清

徐波字元歎吳縣人有浪齋新舊詩

詩話元歎居天池落木庵鍵戶長吟心如止水恆斷
炊靈巖退翁分鉢中餐周之他有所遺弗屑也牧齋
贈以詩云皇天老眼慰蹉跎七十華小劫過天寶
貞元詞客盡江南留得一徐波元歎少與鍾譚友善
落木庵榜卽竟陵所
書詩中亦時及之

夜寒與劉石君陳伯迎叩達公河畔禪居

月斜道少人風吹旛獨舞入戶燈光微古佛爲之主斧冰
析寒薪茗椀味餘苦城上雙槌鳴歸途各自取

再宿包山蔡居士湖上居

湖山相與晚秋館自多陰黃葉悲遺老孤燈攝夜心蘆花
月上易水色雁來深彷彿當年事情生不自今

若耶溪望對岸雲門諸峯云中有三十六灣溪流宛

轉會日暮無人至路口而返

秋溪如月上轉泛無終窮微波出城路幾樹迎船風眾慮
一洒濯遠色久玲瓏峯影半水面秦望標其空人間仰蒼
翠山中閉洪濛思乘青竹筏周流元氣中日落松柏裏先
夜水仙宮風雲多氣勢獨立恍余躬靈境遂相失分手但
西東

涼夜懷鏡新上人

久坐身無影知師心已安蟲悲天地窄月近水雲寬猥巷
違羣動荆扉閉小寒是能從所悅持此寄人難

月下與商孟和尋陳古白於鐵佛山房

月中坦步似乘虛忽憶幽人靜默居鐙火叩門通欸欸衣

冠隱几出徐徐向衰有幾相逢地少賤空多未讀書天與
浮名宜漸棄亂離持此欲馬如

宿弁山積善寺同周虛生作

雲峯終不近石路寺門前霜蔓懸瓜重風庭聚葉圓殘鐙
連曙鳥眾響入鳴泉愛此清虛夜與君得晏眠

七月望後寄寒碧上人

與鍾譚亡友
周旋甚善

楚鬼微吟上峽謠中元法食可相招憑師爲譬興亡恨雨
打秋墳骨亦銷

歸莊字元恭號恆軒崑山人有恆軒集山游詩

詩話恆軒好奇世目爲狂生崇禎季嘗更名祚明其
別字或稱歸妹或稱歸平來或稱普明頭陀或稱慶
鑿鉅山人若元功園公懸弓則皆取與元恭同音善
行草書工畫竹嘗作萬古愁曲子自古聖君賢相無
不誣訶而獨痛哭流涕於存亡興廢之際辭極恣肆
後傳入宮中世祖甚賞之以授樂工命歌以侑食

遺民之歌哭播於興代之宮懸全謝山得沈繹堂所
記以爲一異事也近人據舊鈔本定爲熊魚山作

題福源寺羅漢松

福源建自梁大同創寺之年植此松歷千餘載寺再廢此
樹不改青蔥龍大二十圍高難度攬擎天際如虬龍石根
鐵幹苔斑駁狂風搖動聲錚鏗夜然長明鐙晨撞萬石鐘
聲光震耀生靈怪柯葉常有白雲封水車之役大木盡斧
斤欲加鬼不容天王柏上方松昔年來游有題詠何況此
樹六朝之遺蹤松之名者今有報國古岱宗彼以神京名
嶽顯此獨晦匿於震澤之濱縹緲峯大材僻處自矜貴賞
玩不辱於凡庸大抵植物有如此人生何必皆遭逢嗟哉
人生何必皆遭逢

落花

枝上黃鶯漸露身飛英歷亂墮紅塵將隨薜荔依山鬼難
共薜蕪待美人河北名園貪結子武陵歸棹欲迷津香車
寶馬緣都盡天與幽人一錦茵

馮舒字已蒼號默菴常熟人明諸生有默菴遺藁

詩話已蒼與弟定遠並負詩名善持論爲錢牧齋所
推許近體以晚唐爲宗古風才氣視定遠差縱逸晚
年以懷舊集被文字之禍先在崇禎中因牧齋
獄事牽連被逮所著虞山妖亂志叙述最詳

過堯山

旅舍窗穿漏殘月擁被難禁朔風烈未分曙色雞始鳴僕
夫戒途催曉發試問前行何所之云有堯山峯突兀縱橫
無人六十里魑魅强梁戒倉卒畏途聞此骨已寒託身蹇
衛甯交睫東方殘魄何希微太白當空恣蓬勃忽然狐兔
立如人俄爾鬚眉凍成雪此時心死魂欲墮身命已拚輕

一擲豈知險阻本無多頃刻曛曛曉光赤遙望炊煙五里
餘草短霜乾亂行跡中宵噩夢忽然蘇前此憂危總冰釋
始信人言不足憑直道自應無險阨丈夫但保坦蕩心地
濶天空未憂窄

丙戌除夜是夕立春

枯草還蘇又報春亂餘留得病中身懶攜筇杖尋如願聊
剔燈花誦逐貧眼暗怕看新換厯鏡清慚負舊時巾閒愁
總有三千斛擬寫長箋奏玉宸

仲夏村居

尋得君公避世牆開門遙趁竹風涼逢僧自覺心期在曳
杖還誇腳力强高摘白雲供笑傲騎青牯恣顯狂海鷗
自是忘機者淺蓼深蘆處處鄉

柳絮

不著根株到處生飄為飛雪落為萍江流看取千尋濶占
盡還應賸一泓

漫漫密密逞精神棲薄何分溷與茵卻恐章臺新雨後也
隨馬足伴紅塵

馮班字定遠號鈍吟常熟人有定遠集鈍吟集游仙詩

王東澂曰趙秋谷於近代文章家多所訾警獨折服
馮定遠一見鈍吟雜錄即歎為至論至具朝服下拜
嘗謁定遠墓以私淑門人刺焚於冢前張南山曰
定遠臨桂伯墓下絕句蒼涼之意出以絲麗之詞是
謂才人

之筆

詩話定遠論詩力排嚴滄浪之說故為秋谷所傾倒
其詩以晚唐為宗時復溯源六代胎息齊梁尤不喜
江西派謂熟讀義山自見其弊所作雖於義山具體
而堂宇未闕每傷纖仄則才限之也竹垞所錄多風

懷之作今取其意較深摯者游仙
下編出於滄桑之後殆進一境焉

猛虎行

煙霏霏雨微微，鬼啼猛虎饑。山家苦竹圍茅屋，遙見煙中尾。轟轟夜聞前村失，黃犢村路泥深印。虎足天胡恩，此物而俾之食肉，不見泰山之下婦人哭。

燕

解舞腰肢解語聲，伯勞相背兩輕盈。將軍若愛封侯相，正待金門甲第成。
長養嬌雛翅未齊，一園竹樹晚低迷。當時若愛吳宮住，爭向茅檐得穩棲。

經瞿起周曇園

華屋重來淚暗彈，桐陰滿地作秋寒。游絲風撼啼鴉樹，積草煙生鬪鴨闌。誰論絕交思任昉，空憐誅德有潘安。壞牆

醉後曾題處徧檢蒼苔自讀看

江南曲

春風一夜吹江色千里細煙生亂碧草芽纖細徧金陵古
石苔荒江令宅年光歲歲常如此千燒萬戰臺城圯鷓尾
塵埋三閣平張孔銷亡二周死石頭城下水悠悠暗數興
亡得幾籌山川不改繁華在兩槩依然迎莫愁

行路難

自許直如繩看君白如雪一朝更變不似先霧裏看花雲
裏月夢中不悟君心異言笑依依尙相悅五更欲曙百鳥
啼元鬢生絲淚成血念君舊恩君豈知萬物榮衰各有時
君不見黃蜂階下收殘蕊轉眼飛鶯過別枝

村居月夜

地耳余言 卷之三
三
微雲不礙月木落小庭寬老去餘殘興朋來免獨看鵲飛
愁到曉牛喘不知寒莫問悲秋意關山行路難

感事

風景當前漫撫膺東南忍見杞天傾龍盤王氣山空在馬
渡江潮水未平誰致倒戈攻鐵甕更聞降孽掠蕪城謝安
王導惟邱墓天塹徒縈十萬兵

和錢耐翁次先師韻

廿年藜藿許君嘗曾爲成章賞我狂草發陳根山自碧鶯
啼宰木梓空長東門有恨還無嗣北海何人爲立鄉最是
駑駘筋力盡幾回驥首憶孫陽

寒林

曲直郊原樹風中寒色來枝交夸父杖意盡仲文槐漏日

穿斜影封霜滑破苔秋前搖落意年長倍添哀

柳枝詞

汴水東來欲下遲千條依舊裊金絲蕭娘流落宣華死當日春風爲阿誰

臨桂伯墓下

馬鬣悠悠宿草新賢人聞道作明神昭君恨氣萋宏血帶露和煙又一春

游仙詩

龍伯無人釣餌閑黃金雙闕自嫋嫋燕昭老去秦皇死可惜蓬萊在腳間

配直長林禁散行飄飄羽帳綴珠纓偶然夢見歌謠處卻是風吹玉樹聲

金母東家猶小郎摩挲寶劍倚天長笑他后羿調弓矢不射妖星射太陽

回首空城一掬灰誰知白骨是仙才遼東城郭非如故何不丁仙更一來

靈文深秘莫輕論空學元談未合真好笑少年王輔嗣洞宮長作守門人

臺觀茫茫苜蓿肥至今汾上白雲飛歲星便是騎龍客辜負君王獨自歸

朱鶴齡字長孺號愚庵吳江人有愚庵小集

詩話長孺明季諸生國變著書不出所學以說經為長其尚書碑傳詩經通義讀左日鈔李義山詩注及小集十五卷皆著錄四庫集後附傳家質言十餘條謂庚午辛未間復社盛興邑侯亭宇唐師薦於張天如先生欲得余一見卒不往由今觀之大社果非美事余之不往不失為自立又與吳漢槎書云三十年

來奄忽無成始而汎濫詩賦既而黽勉古文後因老
友顧甯人以本原之學相勗始湛思覃力於注疏諸
經解以及儒先理學諸書麤有成編提要稱所作韻
語頗出入少陵義山之問而寄興清遠能不自掩其
神韻明詩綜錄廣志感遇二篇皆不見集中其五
七古多感槍低徊驚心動魄之作今備采以補之

感遇

吾生本天植廓然棲靈根神明坐搖蕩遂與狂奔風波
得深警萬感寒心魂賤貧生易達寂寞吾道存庶幾屏形
累出入無窮門

朱明未云滿龍火已西移日車無續景壯士安能持一葉
墮庭柯寒風栗我肌老壯更相迫蚩蚩欲何爲榮華爭努
力祇供霜霰欺誰見西山藥可駐百年期

敗葉鳴空階號蟲弔秋影默默誰與娛憂憂互相引達人
感無生志士抱遙省苟無繁霜驅安得腐草屏天心警虛

華物性趨嚴冷徒深顛顛悲此意誰能領

流雲本無陰日昏氣隨變桂蠹非一朝桃蟲生隱患但見
一葉秋已知三陰晏如何守蚩蚩倚伏失前算天運忽已
移山花亦彫換禍樞豈無因徒令識者歎

易填東海波難鏟太行險太行方寸起一步乃九坂鋒矢
日相尋毒流及元冕柏梁隨草根瓜蔓終不翦往復見天
心殺機還自踐悠悠白馬津千載同憤懣

熊羆不相啖梟獍不自戕人則甚于斯生理安得長儒教
發大冢陰符蓄不祥古聖貪所務遂開後世殃傷物無獨
利愚者乃爭強干戈終未已勸君且後亡

峽中亦有日海外亦有槎我生獨崩迫沈憂浩無涯出門
愁滿道入室愁滿家芳蘭骨不立叢菊秋空花萬物非可

悅百年誰見賒如何違此性役役隨翻車

神龍無尺木反爲螾蝮陵芳蘭生匝牆亦隨蕭艾零小人
甘齷齪安知楹與莛黃鐘奏鏗戛反謂蟲鳥鳴神物不可
侮侮之見精靈君看百丈湫怒蛟誰能督

赤日盪靈魂秋水澄心胸覽觀良已久何用謀去從虬蟉
享朝景自謂百年躬智愚迭相笑萬古同夢夢西南望懸
圃光氣何能熊玉英無敗色靈草有鮮容誰能追羽駕煉
藥瑤池東

苦寒行

瑛帝寒威何酷烈東南地維迸將裂太湖堅冰百丈深魚
龍潛竄重陰穴干村惟見凍凝雲萬頃不聞濤噴雪西風
日吼天地昏估客漁翁往來絕瘦日隱見無晶輝鍾山燭

龍光欲歇雖然陽氣終回旋可忍罷民重酸切官稅榜笞
髓已枯天行嚴凜骨還折時聞艇子陷冰圍絕炊隕命窟
窟窟兼之茆屋僵赤膚妻兒號寒忍嗚咽嗟乎彼蒼何夢
夢水旱頻仍不堪說復見殺氣東南行災沴荆吳恐仍結
君不見千戶封五陵俠輦裘快馬出京闕誰信無衣叫寒
月

湖翻行

太湖西來天目源七十二溪波濤奔震蕩有時溢原野未
聞浩瀚迷乾坤五月稻秧齊插蒔三旬霖雨水澎溲方憂
漏天移澤國忽駭狂瀾卷平地颶風猛發神鬼愁火龍擲
火驅潮頭漂砂礫石失垠岸發屋拔樹蟠蛟蚪聲如列缺
鬪霹靂勢如共工傾不周乘陵城郭墮欲倒千廬萬竈皆

洪流巨浪翻騰高屋過大魚撥刺平衢游更憐人畜死無
數浮轉塞港漂難求百歲老翁驚歎久此災邑志從未有
乘船入市何足云地軸翻天浸星斗我時惶遽無竄逃急
上高樓守簔鮫竟日魚釜無炊煙澆愁何處沽村酒變不
虛生豈偶然撫時感事心欲嘔盛朝蠲賑久不聞長吏敲
榜肯停否欲訴真宰天茫茫九關虎豹狎猶守吁嗟蒼生
爾奈何但見號咷走童叟

同大庾介白朗威茂倫樵水海序小集道樹庵

徑入荒畦僻相攜支許儔院涼煙起翠林淨葉驚秋杞橘
浮香細葳莎向晚幽紺園淹對久蘿月已如鉤

酬姜如須見寄

支離一病歎無膠經案繩牀對綠蕉猿鶴化來機漸息芝

蘭焚後淚難消鹿門本自甘遺散皋里憑誰慰寂寥澤芷
江離無限恨頻傳莫惜五湖遙

寄徐昭法

一別精廬歲月徂比來曾有宿春無身窮壑谷能逃忌隱
託文章不厭孤春院繁英傷錦繡秋風落葉感菰蒲稻梁
那得糜黃鵠莫怪長飢化白鳧

潘榿章字力田吳江人明諸生有觀物草廬焚餘橐

詩話力田幼慧通天文地理皇極太乙等書專精史
事與同里吳愧庵炎同罹莊氏史獄兩人皆與亭林
雅故力田初作明國史考異成十之六七亭林服其
精審莊氏修明史未受其聘莊以其名重於卷首列
入參閱遂被禍亭林時客汾州賦詩遙祭又寄力田
弟次耕詩有云猶存太史弟莫作嗣書人後次耕舉
鴻博與修明史初所未料力田詩才不逮次耕而真
宰所存未可磨滅虎林漫成四首在獄中作愧庵則
竟無所傳矣

聽陳鍊師彈琴

商絃川上發元言振棘林白鶴下庭際北風微來侵排雲
呼閶闔浩蕩思難任僊佺爲我馭雄龍空中吟曲終有餘
暢洞門花落深豈惟冥俗累亦以澄道心邱中雙桐樹霜
雪凝奇音吾欲採其幹贈子徽黃金

丙申寒食

陌上初過雨人家欲斷煙長因三月候重憶十年前荒薺
埋陵殿饑烏集墓田併將家國淚一灑白楊天

集菊花下忽憶亡友謝兩周吳北窗悽然有感

徧插兩人少悲歌安可聽花前詩異代天上酒雙星粟里
招同去浣溪祝不靈黃華如勸客杯到莫教停

答皇士見懷

東坡先生詩集卷之三
三
曾列中朝侍御臣獨將詩史慰沈淪見聞先世存微隱論
次遺言入雅馴人閱死生徵共信事憑好惡定誰真思從
藜火分餘照敢擬當年歆向倫

飛騰前輩早升堂零落遺編賴表章

皇士有遺詩之選

一代雅音

歸正始千秋潤色愧三長荀生餘力傳申鑒陸子何心著
辨亡自謂整齊非妄作名山副本待君藏

擬收京

天家旌旆下重關朝會花冠震百蠻兩觀已懸新鈇鉞羣
官猶戀舊行班風雲驟捲邊沙靜日月重開社稷還喜聽
謳歌同屬啟鼎湖有泣不能攀

軍城早秋

西風獵獵臂鷹輕不見平原雉兔橫玉帳丁甯無一事只

須高起受降城

白雲泉是白太傅題詩處

白公遺碣萊苕生落日空亭見一泓借問涓流爭到海何
如終古在山清

關山月

繡衣金匱匣寶馬鐵連螭出身誓向邊場死那能宛轉妻
兒前離家復見故鄉月見月思鄉情不歇天山飛鳥卻向
南隴頭流水分嗚咽幕前健兒歌且悲霜寒風勁胡馬肥
閨中遠不聞吹笛塞上誰愁聽搗衣可憐夜夜關山月只
照從軍不照歸

和陶乞食詩贈乞食諸君

溝壑勢所逼貿貿行安之促步望煙火低頭好言辭善悉

主人意高義無嗟來升斗竭所餘滿腹輒廢卮感激話疇
昔內熱牂羊詩同里無賑恤曷云濟世材愧客供給薄強
飯以相貽

虎林漫成四首同吳愧庵作

抱膝年來學避名無端世網忽相嬰望門不敢同張儉割
席應知愧管甯兩世先疇悲欲絕一家累卵杳難明白憐
腐草同湮沒漫說雕蟲誤此生

吳關一路作羈纍棘木庭前聽五詞已分殘形輕似葉卻
憐衛足不如葵下堂真愧先賢訓抱壁幾同楚客悲縱使
平反能苟活他年應廢蓼莪詩

圓土初經二月春薰風又到繫維身流螢夜度締袍冷採
蕨朝供麥飯新敢望左驂歸越石還期長珮疑靈均多情

最是他鄉侶閒譜龜茲慰苦辛

閱歷風霜祇自疑難將身世問時宜窮愁只合吾儕事
姓氏羞為獄吏知見說成書刑鑄鼎不聞有夢召胥靡
南山此去躬耕好未可重題酒後詩

任源祥字王谷號息齋宜興人明諸生有鳴鶴堂集

詩話王谷與同里陳定生相友善定生故與貴池吳次尾梁溪顧子方共倡留都防亂揭以攻阮大鍼者也留都潰次尾子方死定生伏處村舍王谷亦棄諸生服以詩文自娛中州侯朝宗至宜興定交朝宗嘗敘其詩謂銅官兩湖山水之勝其中有

贈史遵之

涉江采芙蓉日暮不盈籜念子好芳草棲遲水中宿
中有雙鴛鴦羽毛紛沃若知君無嫌猜相隨傍君屋

贈侯方域

有客自梁園薄游千里來舉手揖故人下馬拂遠埃同調
誠匪易相逢述中懷我友並讌集良夜相追陪開筵飛羽
觴璀璨列九微諸伶按節歌絲竹清且悲參橫斗復轉霜
露塗堦墀君有慷慨情今昔多所哀黃鵠絕四海羽翮何
差池詠彼西園詩心焉難奮飛

贈陳維崧

灼灼幽蘭花馨香不自持昂昂千里駒終當任驅馳寒暑
相代謝藏用各有時譬彼齊紈扇當春復光輝華堂列高
燭清夜相追陪雞鳴駕言別俛仰各賦詩江漢東南流浮
雲西北飛願君崇令名千載以爲期

哭陳定生

天道一何遠奪吾陳仲弓典型忽已替志義更誰同憶昔

文章盛相資氣誼隆先民推李郭後進說褒融清議排羣

小危言仗數公司徒神采毅定生父子廷上舍羽毛豐厨

顧名流輩龍鸞國士風節由貞母峻德自隱君崇定生曾

氏貞節建坊祖一疾惡元成性防微實有功定生與吳應

都防亂揭禍機乘間發世變涉塗窮事詳消長波濤裏存

亡險阻中馮生如束溼吾黨盡飛蓬碩果人還在靈光數

未終銅官秋色靜陽羨曉雲空默坐書千卷論詩酒百筒

忘年為倡和推分略愚侗得句成欣賞繙經賴折衷狂夫

慚阮籍老友識王戎長君維崧與庭訓高宗匠家聲擅國

工祇今瞻仰失歌闕涕霑胸

贈侯彥室朝宗子

遂爾持雞絮仍然得鳳毛多聞光世及如見慰吾曹問字

篝燈苦傳經閱高梁園千載事今又屬枚皋

陳其年游姑蘇歲暮卻寄

吳王宮外踏歌行紫玉墳邊臘鼓聲歲暮乘舟湖海客

裘春草不勝情

顧祖禹字景范無錫人有宛溪集

詩話景范僑居常熟之釣渚故以宛溪自號晚年崑山徐司寇聘修一統志書成司寇欲疏薦之力辭蓋自甘為遺民也所著讀史方輿紀要亦於志局成之采摭要刪博而能精諸行省皆有總論臚舉形勢證以史事足與馬端臨文獻通考總分諸序相埒開朗誠摯善與人交與魏叔子為友叔子來游與同觀桃花值雨親為執蓋叔子客死真州奔哭甚哀為文以悼之其篤友誼如此遺集久佚不傳僅於梁溪詩鈔海虞詩話中略見片羽

送王石谷憚正叔

秋色牽衣戶半扃君行應念此園亭桐枝濯濯傍檐綠竹

葉垂垂帶雨青別意欲言思轉澀愁懷難解酒無靈漫勞
握手增惆悵他日還添兩鬢星

過石谷秦淮水閣看畫鵲華秋色圖

輞川六月寫滄浪夢入平津逸興長卻憶揮毫千萬里風
生腕底爲君涼

送魏叔子還甯都

大地方沍寒君行涉江水問君行何爲抱膝深山裏易堂
好弟兄事業寄文史天空鵬鶚飛日落雲霞起遙望翠微
峯迢迢四千里吾欲牽君衣君行其少俟好風從東來揚
帆疾如駛山中正春光寒香放梅蕊

甲辰九日感事

蕭颯西風動客愁攜尊無處漫登樓赭衣天地驪山道白

明倫彙編 家範典 卷一百一十五
三
恰親朋易水秋征雁南飛無故國啼猿北望有神州茱萸
黃菊尋常事此日催人易白頭

俞南史字無殊自號鹿牀山人吳江人諸生有鹿牀橐

懷徐元歎

樹暗川原淥閒堂晝已陰我愁一水濶君又萬山深遠樹
芳蘭渚空思薜荔吟名高身不出花下且彈琴

過顧茂倫村居

境以居人重情因遇故深酌泉偏愛淡看竹共分陰草木
山中歷桑麻世外心閒吟忘永夜明月照披襟

游元墓因禮三峯禪師塔院

暮春招我友輕帆遠相屬溪盡未卽登捨舟遂遵陸憩蔭
稍遲留一覽契遐矚鐘聲杳靄間流映春山綠徑僻步紆

回空香沾草木紺宇插松顛花宮掩深曲入門器益嚴瞻
禮威儀肅高下隨所構長廊遞相續水色湛虛明幽林隱
清馥惜哉創者難遺影空堂宿靜念有餘思躊躕下山麓
王澐原名溥字勝時號僧士華亭人明貢生有輞川詩

鈔

烏棲曲

黃昏漠漠黃雲迷烏來欲棲不得棲十二樓臺鎖煙霧烏
來棲向誰家樹此時客子心惻惻起看落月霜華積一聲
清角烏頭白

春日村居

冉冉年華去遲遲春日來倦游宜閉戶晏起怯登臺雨至
催鳩婦風輕出雉媒微茫三徑在誰爲破蒼苔

現年余言臣卷一五
三五
小築違塵市西疇舊草堂誰言林未密惟愛日初長宿雨
低江柳晴雲上海棠晚來餘興在秉燭繞迴廊

酬張洮侯

滔滔塵市裏之子自悠然能著幾兩屐權牽岸上船刪詩
四始外頌酒七賢前被酒行吟者誰知是列仙

春興

寂寞幽居獨閉門三春風雨暗荒村堂前海燕驚新壘澤
畔江蘼滿故園老至漸思榮叟樂狂來尙念武陽恩平生
不負漁樵約十載鶯花酒後論

探奇南到會稽來上巳東風一舉杯白日雙珪大禹穴青
山萬點越王臺江關詞賦多哀思幕府風雲少霸才會是
六龍飛動處登臨無地不徘徊

上苑花飛御柳絲
葱龍煙樹鎖龍池
已誇絕域來符拔
更著新冠飾駿驕
種就葡萄騎玉勒
吹殘感粟醉金卮
漢宮舊事誰曾記
青塚春光又一時

喜劉臣向至卽送其栝蒼之游

聞君耕釣大江濱
十載心期託隱淪
檻外風帆收楚蜀
夢中煙月隔梁陳
逃名昔日因鉤黨
作賦經年未逐貧
東海爲予勤寄問
仙都賓客是何人

仲春大雪漫效元人體
題顧寄園倣右丞江上七樹
七十風流老畫師
練裙紈扇竹枝辭
無端催卻春歸去
獨翦孤鐙對墨池

我家右丞江上樹
近在滄洲尺幅間
今日爲君重設色
滿天春雪點春山

贈孫錫黃移居

小山招隱野人家叢桂森森倚檻斜客至不知誰是客登樓閒坐看飛花

呼谷初名簡在字德下崑山人明諸生有葵園集

詩話德下明亡後謝去諸生遜迹荒郊足不入城市者二十餘年錢受之見其南燭詩歎為絕唱期一見不可得葉文敏撰獨賞集稱為東南隱士之冠文敏蓋德下門人葵園集其所刻也

歸元社游鄉校詩子總角時與同里歸元社等七人為兄弟交元社最長稱兄篤翁多

文而久不得為諸生歲辛巳鄉貴有利其婦翁多貲者嫉元社繫之暗室中予與朱子與升求之不能得值俠士葉水修眉初手斷其鎖出之旋就試為諸生而元社年且三十有八鳴呼以元社之為人雖終不得志而屈辱於人雖諸生亦不成雖復去而為賈為農為傭夫亦何傷亦何病於予之與友然為諸生矣予嘉其處困而讀書不衰且以舊好作元社游鄉校詩

世人好結交結交如麋麋君子重結交結交比金銀麋麋

驚則散金銀爍則新我儕二三子束髮小小親寒暄十年
外居址尙比鄰豈無死與生豈無富與貧同憂處亂世恭
敬祈免身歸子性最純無故爲冤民幸逢奇俠士今易儒
者巾采芹樂泮水呼我酌更斟欲酌向他人他人未必真
不如二三子習熟寡費神蘭蕙自楚楚百草蔓荆榛交隘
吾道廣未願四海人

西寺施粥

金木有饑饉所荷均皇仁常平盛朝事水旱膏無屯吾生
值亂世此義安復陳行麤遵月令爛額愧徙薪有司僅倡
募中懷實苦辛獨飽視眾饑未忍越與秦黽勉告同志蒙
恥亦拯民豈無西江波斗水涸轍鱗捐家散百萬惜哉無
義人豈繫無義人邑小人實貧

晨朝操瓢勺襁負及子孫重趺五里至後先爭一門涓滴
未入口假息半游魂須臾見人色果腹倚樹根幸脫胥吏
手眾施厯厯存殿角旭射光羣飲聲泉奔施者見受人舉
體同春温取意快目前冥報奚暇論安得嗣旬月更使被
遠村

和豐庵詠和載西禪師

燼香陷爐側饑鼠竄荒坵佛鐙澹微明隙光出林梢棲鳥
靜相依見慣亦安巢何人炤無寐夜聲風雨交
屋梁飲初光威儀照四座一嘿念羣生山鳥已廢和妙香
清餘聲朝氣始無情梵輟鳥亦寂樹滴露珠顆
地僻心已遠澹然寡營欲時聽止觀經共此深密竹浥彼
林泉清飲我僧飯綠閒曠每白日客至遠塵俗

亭亭百年樹諸天密護計本以侍莊嚴因之覆蕘櫪空涼
浴佛頂交枝雲亦滯上爲風雨痕下有龍蛇勢
一泉爲雙井雙亭行人息駁犖千歲苔彼此無殊色俯臨
披水容曲堤影偏直禪子坐無枯隔竹日聞汲
夕陽有何意欲說與開士嶮嶮天外青當窗一峯峙真氣
晚益佳賴此淡城市歸鴉向蒼煙將息復舉翅

寶劍篇

風胡死後失神鐵若耶谿平堇山穴誰取荆軻一片心融
作魚腸三尺雪左蟠青龍玉錯文右蹲元豹珠環潔代遠
苔荒蝕字痕獄成冤沈霜欲折開時但見土五色把似眾
星俄失列當時百鍊金液存水火千年魂魄結佩之衽帶
致雷雨天人咫尺相提挈飛行中夜千里還正練寒光河

漢絕神物出興關世運應指機槍電掃滅我欲贈人拭明
月走盡燕趙無豪杰湛湛蓮花歸藏匣雄雌相思聲嗚咽

過徐介白齋中題贈

世亂君全福清貧花一畦山中逃祿母樹下灌園妻節苦
時賢恕形疏里俗詆閑門乞書畫桃李亦成蹊

潘陸字江如吳江人明諸生有穆溪集

包驚幾夜過

故人寒夜至風雨暗東窗不忍論前事還同哭所知住山
多病後學佛破家時猶念飄零者殷勤重有期

同玉魚過肇伯飲感賦

門前橋影漾江流幾度吞聲哭故侯公子苦飢還置酒老
夫向晚且停舟百年天地傾朋黨十載逋逃任馬牛漠漠

海雲連朔氣又驚初雁過吳洲

冷士喟字又喟號秋江丹徒人明諸生有江冷閣詩集

詩話秋江絕意仕進終身不入城府貧課
生徒自給詩有唐音其酬唱多遺民也

寄劉令言

關河霜冷雁南游雲物淒涼屬暮秋
萬里飄蓬猶作客三年戎馬更登樓
艱難阮籍窮途哭憔悴江淹去國愁
爲報他山搖落盡風塵惟有敝貂裘

題妙高峯

天拔一峯起波空四面開江光浮島嶼
潭影浸樓臺折葦番僧渡乘槎海客來
何須更壺嶠此地卽蓬萊

述懷與魏叔子

我有匣中琴度之高石壁三年不一彈
祇爲知音隔偶爾

忽逢君開囊鼓在昔上念義農人下念采薇客雅曲不須
繁所貴深衷白彈罷各無言西看楚天碧

郭開泰字宗林號巽耻上海人明福王時拔貢有味諫

軒詩橐

詩話宗林以志節自勵甲申後不薙髮
蠶處以終生前吟詠皆寓忠孝之思

寄衣曲

商飈落葉如飛燕寒衣處處催鍼線征夫一去未曾還十
載相思不相見相見家鄉詎有期舊衣寄盡寄新衣織成
窗外三更月縫就燈前半曉雞憶昔裁衣手腕輕算來寬
窄能相稱悠悠離別已多年心意商量愁未定定識腰肢
舊日非翦來那得更寬圍試把妾身還自約嫁衣寬盡不
相依再四丁寧寄徒侶願見兒夫親付與淚痕滴上半成

殷到日開時應認取吁嗟乎王家多難爲前驅休說封侯志尙虛又恐思家徒亂意衣間不付一封書

開歲往役海上暮春還時家更空乏賦此

勞苦三聯月還家忽暮春庶人宜往役吾道敢辭貧未得銷形影何能作隱淪桃源虛設想莫認記爲真

宮月

宮分三十六誰不是嫦娥明月知人意君王幸處多不寒飄翠袖如畫徹清歌借問長門裏逍遙步若何

韓洽字君望長洲人有寄庵詩存

詩話君望治長之學撰篆學測解釋訓考源足證說文長箋之誤詩簡質清剛不落當時流派竹垞謂敢禎之際稱詩吳下必以君望爲巨擘

猛虎行

蘇郡故無虎比歲數獲虎云自宜興諸山渡湖而至擬古樂府作猛虎行

虎欲異羣虎舍山而渡湖自失險阻窟託身就菰蘆村落
齊戒嚴鄰保相招呼糧鉏代戈矛勇銳當先驅爪牙豈不
猛其如處世孤奮鬪亦良久力盡乃告殂錦斑斃野草割
剝無完膚嗟彼田舍兒曾非卞莊徒何乃百獸尊輕身死
庸夫萬類固竝生所宅各有區一朝處非據適足亡爾軀
持此告羣虎毋若此虎愚雄長山林中賁育孰敢圖

鐵馬

急響中宵發凌空鐵騎行不知風信至頓使旅魂驚當世
正多事吾儕方苦兵那堪檐宇下又作戰場聲

錢曾字遵王常熟人

詩話遵王牧齋族孫為牧齋注初學有學二集承緒
雲餘緒家有藏書撰讀書敏求記收藏家講板本者
不能出其範圍嘗秋夜宿破山寺賦絕句十二首牧
齋甚賞之取為吾炙集冠尤推許琉璃籠眼二語謂

取出世間妙義寫世間感慨並題二絕句云籠眼琉璃
映望奇詩中心眼幾人知思公七尺屏風上合寫
吾家斷句詩高樓額粉笑如雲還鉢休隨慶
喜羣大叫曾孫莫驚怖老夫原是武夷君

秋夜宿破山寺絕句

空庭月白樹陰多崖石巉巖似鉢羅莫取琉璃籠眼界舉
頭爭忍見山河

晚晴篔簹詩匯卷十五終

晚晴謩詩匯卷十六目錄

錢澄之 十七首

林古度 九首

劉城 十六首

許友 十一首

紀映鍾 十三首

余懷 十二首

徐延壽 七首

高兆 一首

吳嘉紀 十九首

陶徵 八首

龔賢 三首

程邃 二首

戴本孝 六首

戴移孝 一首

方文 十一首

丁之賢 二首

高國定 一首

季步騭 六首

張度 三首

唐允甲 二首

余紹祉 二首

崔冕 二首

晚晴縹詩匯卷十六

徐世昌

錢澄之初名秉鐙字幼光更字飲光桐城人有藏山閣

橐田間詩集

韓慕廬曰飲光少負盛名為諸生祭酒遭明季崎嶇
 喪亂與時消息其為詩冲淡深粹出於自然度王孟
 而及於陶矣朱錫鬯曰幼光禁網潛蹤麻鞵間道
 或出或處或默或語詩屢變而不窮要其流派深得
 香山劍南之神髓而融會之昔賢評陶元亮詩曰心
 存忠義地處閒逸情真景真事真意真田間一集庶
 幾其近之

詩話田間為諸生即有聲於時與阮大鍼同郡夙與
 相迂南渡後大鍼欲興大獄刊章捕治田間亡命走
 浙而閩而粵崎嶇絕徼備嘗險阻歸里削髮為僧名
 幻光既乃復冠帶詩五古近陶他體出入白陸原本
 忠孝冲和淡雅
 中時有沈至語

田園雜詩

仲春邁時雨旣雨旋亦晴百草吐生意眾鳥喧新聲紛紛
羣動出各各有其營孰是形骸具而懷安居情秉耒赴田
臯叱牛出柴荆耒耜非素習用力多不精老農憫我拙解
輒爲我耕教以駕馭法使我牛肯行置酒謝老農願言俟
秋成

今晨放大牛水田調生犢穉子原上呼有客訪茅屋田烏
噪正喧招手去何速念此爲誰歟有馬又有僕舍耕還入
門友誼素云篤田潦溼我衣泥塗霑我足且爲解襪襪易
我揖讓服故人持不聽訝我未免俗呼兒出草堂敕厨炊
脫粟我去送牛來今夜留客宿

駕牛東臯上有客問我經我牛依田轉客亦隨我行請問
大易旨此理不易聽乾卦冠潛龍遯世去其名奇門稱遁

甲迺能役九星祇茲无首義可農亦可兵八卦周天轉六
位以時成時哉不可背亦豈容將迎朝爲輦上客夕爲隴
上耕斯義如轉圜指出子應聆顧客且安坐吾牛不肯停
東園有嘉樹開花照昏曉一爲葛藟榮遂使枝條槁枝條
旣以盡葛藟榮未了我欲解其纏轆轤死相抱念此不能
除斬斷乃爲好斬藤樹亦傷藤去樹以保今晨心目曠宿
穢淨如掃樂哉嘉樹柯且復惜其老寄言種樹人此物去
宜早

屋上春鳩鳴田家穀始播時雨催我還倚鋤檐前坐牧童
去未歸雨聲聽漸大時雨豈不嘉所慮老牛餓自往喚牧
童牽牛入闌卧我牛旣以來我鋤行須荷田疇及時治况
復雨初過亦知冒雨寒爲農焉敢惰

春天不久晴衣垢及時澣身上何所著敝襦及罽短家人
念我寒一杯爲斟滿酒滿不可多農事不可緩奮身田野
間襟帶忽以散乃知四體勤無衣亦自暝君看狐貉溫轉
使腰肢懶

人生會有盡行止非自由止亦不可趣行亦不可留如何
柴桑叟汲汲爲此憂終年痛飲酒冀以忘其愁吾身聽物
化化及事則休當其未化時焉能棄所謀有子亦須教有
田亦望收天心與人事何息不周流我不離世間而願與
天游焉能外親戚視之同聚漚乃知黃老書不如孔與周

雞鳴

冬已過半夜偏長愁人不眠獨在牀寒雞擁翰不肯叫老
鷓得氣山頭嘯山頭有虎伺人行佞鬼騎虎學雞鳴雞在

牆根鼓兩翅欲鳴不鳴時未至村南村北聞犬喧雞未三
唱勿出門窗前山鬼太無賴低頭樹下學人拜遙遙古寺
打鐘聲一聲一拜聲聲驚雞鳴一聲天下白千狀萬態從
此滅

湖孰種菜歌

金陵城東湖孰村中有隱者開平孫通侯甲第今已矣意
氣豪華無復存開平去今凡幾代五王之後惟君在往昔
爭言青門瓜如今獨數湖孰菜問誰種菜滿畦新一家生
計只三人終歲把鉏菜畦裏婦能炊飯兒負薪爲君婦亦
太辛苦嬌貴當年難比數翟珈賜出小侯妻珠翠裏成上
公女都人猶記嫁時裝如雲妾媵爛生光臺前照鏡輪梳
髻架上熏衣派管香一朝散去竟何有相對惟餘雙白首

彤明卷言四十一
三
早從府內厭笙歌還向村中操井曰村中井曰倚柴扉賣
菜還愁終歲飢夜長不肯燃薪坐十指侵寒綻故衣東川
子孫公主裔妻孥行汲心常愧聞說君婦盡傷情無心更
擬求奴婢

梅花

何處花先放向南三兩村未春天似夢徹夜月無言且喜
昏鴉散毋嫌翠羽喧眾芳久寂寞賴汝照乾坤
離離壓殘雪脈脈照溪濱一任夜無月何妨天不春芳華
憑俗賞風味與誰親祇覺閉門後徘徊似有人

葉聲

墜響空階靜辭柯一葉乾無風吹地走不雨打簾寒已覺
掃堪惜還憐踏欲殘掩門深坐聽山路正漫漫

月夜過沈氏江樓

何處堪乘月沈家樓最明晚來江更大秋到水初清遠火
移時隱孤舟犯夜行市門催客去早是起更聲

別孫不害途中有懷

出街別孫楚驢背獨成眠客影瘦殘照人聲喧渡船魚罾
爭闌口牛路指墟烟念爾柴關掩初抄秋水篇

暑中走椒嶺省方氏姊示諸甥

十七年前椒嶺路短驢疑在夢中行兵烽幾度門無徑靈
雨初通澗有聲牛屋半楹啼寡姊蔬盤一夜費貧甥老來
萬事心灰盡益重人間骨肉情

鳩茲酬張惕中

江頭破衲少知名脫粟親炊見爾情痛入箭創陰雨夜夢

回鑿鼓海潮聲國恩祇覺今生重交道誰言亂世輕傳說
敬亭會卧病又衝泥瀟去宣城

廬山

匡廬入夢已多時乘興先探絕頂奇一路葉埋靈運屐合
山僧待子瞻詩雲鋪半嶺村猶霽雨在高峯客不知小豎
暗攜長笛至擬登五老向空吹

林古度字茂之號那子莆田人

王漁洋曰茂之居金陵年八十餘貧甚冬夜眠敗絮
中其詩有恰如孤鶴入蘆花之句方爾止寄詩云積
雪初晴鳥曬毛閒攜幼女出林泉家
人莫怪兒衣薄八十五翁猶緼袍
詩話茂之早年會與曹能始鍾伯敬譚友夏諸公抗
手論詩年逾九十至康熙初始卒詩不爲鍾譚所囿
風華處儘有
六朝遺韻

入白門

白門迢遞夕陽閒
千里闔天一日還
依舊客情無別事
逢人都問武夷山

芳草

春風催百卉
草色徧相侵
到處沒馬足
有時驚客心
遠連空漢上
寒漾碧波潯
獨有明妃塚
青青恨至今

過孔雀庵訪輝上人

早歲聞初地
凌朝試遠尋
依然一茅宇
宛在千竹林
芳草定時積
清池雨後深
對君論古迹
寂寞起幽心

春夜同陸不淄尤時純子邱兄賦新月

新月出東林
清光猶未深
依人一片影
孤客萬重心
夜淺留餘態
春寒助苦吟
梅花更幽絕
寂寂弄輕陰

同宣仲鷺峯寺聽秋鶯

物候推移傷客魂啼鶯何意戀山村不因落葉林間滿猶
道啼春在寺門

同諸子觀潘穉圭中秘家藏米元章畫楚山圖鮮于
伯機書游山詩記次曹能始韻

相過情不淺好古意何深況有圖書樂能勝絲竹音光華
陳白璧珍重比南金雲樹見楚色詩篇聞越吟神應游上
世客似坐寒林竟日不能去因之敦素心

立春日過萬松庵

萬松通曲嶺殘雪覆寒池今日已春色深山猶未知

嘉善寺

古寺壑中好到來真是禪松聲流夜雨草色積春烟鐘
無鳴日碑殘不記年卻因荒寂意與客更留連

桃花

幾樹桃花一色紅野人籬落見春風種來無意看偏好開
到多時賞復空可奈蝶蜂羣採處亦聞雞犬數聲中曾宜
潘岳閒居賦別有芳名自不同

劉城字伯宗貴池人明諸生有嶧桐集

詩話伯宗與吳次尾齊名稱貴池二妙崇禎間嘗以
諸生被薦堪任民牧詣京師力辭不起南渡上書言
事未見用鼎革後隱居峽山身不入城市詩才駿發
晚益激楚鬱律五言尤勝每次謝臬羽鄭所南之韻
以示標尙又鑄小印曰謝髮鄭心與子鑾唱和最
亦如青主之於眉道人也著作等身文數昌黎詩宗
工部皆力
爭第一流

查村

青山勢欲行其意乃自靜良苗氣已新而理未堅勁敗垣
圍古屋貧氓實舊姓當暑蔭寒流怡情亦濟性樹密夏蟲

稠可中日景正

水漲

雷聲起枕上雨勢欲拔屋蛟龍一夜爭暴漲彌平陸喧歷
聲未停泛溢勢相蹴昨來一曲流今若倒羣瀆氣昏色正
黃意廣情亦驢因思古滔天浩汗周林麓觀水氣勢奇感
事心魂肅

漲後

朝來混浩勢我謂沒陵谷漸殺及午中故道俄然復透池
意何之灣流仍可掬白沙被黃滓量泥甯止斛昨夜所至
痕指示頸猶縮岸坼墜則崩樹倒苗亦覆快意幾何時盈
虛幾已速

秋懷

登邱一騁望百感我心勞天高有雲征氣色但蕭蕭念欲
命斗酒四顧無同袍鷹隼順時擊豺虎尙羣嘯羆劉在古
典毋俾大猾逃利劍不入掌寒士安得驕

代謝成古今榮悴如流屣金鷗從何來著物成凋毀陰生
在午中霜零由夏始豐亨物忌靡離明帝傷恃銜轡一以
弛氣勢來誠駛搖落日趨多蕭瑟不可止

莫羞賤與貧帶索歌常浩莫憂渴與飢滄菊糧堪飽眾卉
泫然徂鞠乃猗與好百舌蝓蟥天蟋蟀俟秋慄豈怨生身
遲笑彼爭時早秋氣窮巷間不歎東門道

梧桐鳳所宿鳶鷂不敢棲蓍收一秉令綠葉辭高枝靈鳥
既不至百尺幹奚爲瑟琴娛世耳不如委塗泥夷仲自放
廢守正亦知幾秋山有佳色行歌宜采芝

相公墩湖心寺示僧琦

廿年常住處每到意能新佛與人俱靜厨因客去塵出林
傳梵放登閣見車麟彌望平湖氣雙龕贊與旻

答劉引之來問近事

莫放漁人入谿山遠作籬鄧馮誰命世黃綺是吾師華髮
短猶在荒村春欲遲寒梅開有日折寄向南枝

村居雜感用所南郊行卽事韻

世絕麟游藪余同鳩寄巢畏人藏短髮問信斷荒郊度日
薪如桂全身藉用茅歸來就燈火詩卷未容拋
屣重泥沾齒風高雨欲沱刑天方舞戚蝸角尙稱戈羣計
田分耦誰言海不波榮期雖有樂帶索未成歌

送麻天爲還里

風雨飄搖已覆巢遺雛戢翼敢譎譎間關謁帝君親事變
姓投人任俠交無力運樵徒背裂有歌和筑未牙聲欲爲
決策馮詹尹知在全乾第一爻

答孔仲石

尙鏞

塵史凋殘文定亡君家世學與誰傷變名人自知梅福守
業時應屬孔臧世已衣裳忘楚楚我今歲月去堂堂賢昆
灑淚騎箕後莫問中原大小匡

春日漫興

眞覺從前事事非息黥補劓破重圍不求甚解書常讀亦
欲無言塵豈揮衣製水田領尙濶冠裁竹籜髮堪晞欠申
曝背茅茨裏惟待春深上釣磯

寄沈崑銅

家瞰江流日夜馳恩讐回首夢中悲望門隔歲思張儉複
壁移時出趙岐南渡只餘花作曲北來每聽角橫吹故人
寥落星辰在勞爾臨風勸酒卮

題王公儼石泉

甘潔寒流滴瀝來石魂冰魄絕纖埃莫將一勺通漁棹纔
到人間不復迴

許友字有介又名眉字介壽侯官人有米友堂集

詩話有介詩澹秀蒼堅漁洋稱有介野航人遠雁聲
低與胡石莊楚人門巷瀟湘色並為名句竹垞又謂
篇章字句不屑蹈襲前人正如俊鶴生駒未可施以
構米友堂
構米友堂
奉瓣香焉

憶秋夜聽客彈琴

去年秋夜半置酒高登臨螢火照金井潭光映素心風寒

生古樹脫葉如微吟眠鳥不成夢偷作三兩音秋色入衣履
白月穿疎林相對有古意深幽歸枯琴

畫湖西謝評事宅

先生之官輕如紙先生之名長不死欹斜一屋傍蘆花兩
扇柴門面湖裏樵歌漁曲來朝昏雨月風煙無間止四時
有客至湖中便道竹邊評事里予今欣慨念先生畫此茫
茫一湖水

從雪溪來磐谷

抱此幽閒福沿山問路行連朝居佛寺到處有泉聲麥穗
垂肩重松鍼壓鬢清願將卜茅屋工課並農耕

齋居喜雨

細草如孤岸春船繫碧桐曉晴山夢裏殘月柳絲中佛古

人心寂階荒鬼語工通宵煨藥餌瓦竈火猶紅

園居卽事

朝起開簾望竹煙入古廳柳樊低瓦綠山補矮牆青蓄藥
先知病藏茶不爲醒晚來農事急日上稻花亭

晚泊瀛田

片棹以遲勝風輕波復微野煙依樹合沙鳥貼江飛人語
孤鄉近郊燈岸店稀記程今夜始一宿在魚磯

神光寺看碧桃花

城頭二月綠苔侵爲訊桃花野寺尋半樹香分疎竹影數
株白近古松陰蝶心蕩漾春高下鳩語浮沈雨淺深蔬筍
偶然無酒禁醉歸清夢戀空林

讀書夜靜聞鐘聲從白月來

石樓隱向白雲封知在岩巖第幾重殘夜讀書人未卧萬
山明月一聲鐘

春日園居

兩樹松濤釀細風數竿青竹石橋東午眠方足新茶苦啄
木聲移嫩葉中

但得幽居草木安小園數步較能寬芭蕉葉下閒來往一
卷殘書斷續看

羣花下土在清明菊種分苗著水輕還見荔陰頽瓦裏乳
鳩傍母習春聲

紀映鍾字伯紫一字槩子號蕙叟上元人明諸生有蕙

叟詩鈔

詩話伯紫以金陵名士爲復社宗主易代後躬耕養
母不面時貴龔芝鹿以總角交爲梓其集行世詩亦

清刻亦沈雄憤時憂國時露於楮墨之間初名其集曰真冷堂詩稿又有補石倉集檠堂詩鈔今藝叟詩鈔四卷爲江陰繆氏鈔本

烏龍潭

龍潭禁城內雖小亦巨澤窅然處西偏遠如避世客古觀
晉唐遺名園隆萬宅宜雪再宜雨宜隱亦宜謫松濤白日
飛荷葉遠天碧在昔中丞公學佛豎鐵脊棄家入無生放
生意成癖鳥影摩天空魚弄波聲濤汪汪千頃陂積鱗恆
觸迫巨舸載沈江生意取相適老僧呪喃喃永斷刀砧赤
講藝集諸生賢豪盡前席微言颯然來如霜面皮擱高格
離人羣真風懾蠻陌歎息斯人亡澄潭空日夕

雨夜強飲

強飲如無事憂心切鼓鼙濁河平地坼懸磬萬家啼問俗

牛哀虎謀生屬國羝一燈如霧裏不寐聽鳴雞
并州連夜雨秋水漲汾河萬嶺交陰氣孤城俯白波鄉心
驚躋策驛使阻盤陀霜令邊庭早清商入浩歌

西軒爲邱季貞題

楚州秋色在城西千樹梧桐晚雉齊亂後自餘明月好霜
前仍有子規啼連山送客悲芳草向晦齋心對碧溪十笏
一軒書萬帙蒼雲深隱鳳雛棲

金陵故宮

朝出天津橋浙浙水帶索暮行清溪濱馬瘦亂芒屨陋巷
猶居人宮牆竄鼯貉云是故宮道敗堵仍未堊恭惟全盛
時皇居壯京雒真人起淮泗一劍驅沙漠神鼎定金陵卜
世過岐亳劉基相澗瀍王宋陳方畧粉雉包山川芳湖填

燕雀南面園邱壇背枕鍾山薄鄧林採榷楠越裳貢丹雘
巍然未央成萬戶千門落閣道鉤槍楛斗杓抵龍角玉堂
翥文鴈金吾仗神爆赫赫武庫藏赤電霄煜爚翳然紫籞
深琅玕朗獭鶯晶晶蓬萊波的的芳菲鐸繡闥祕椒圖雕
櫳鏤鸞鷲經營追靈沼花鳥匪良嶽蒸土繚垣牆利錐不
能斲延袤萬丈餘堅比南山礪鸞輅參陳章麟臺畫魏鄂
日御奉天門虛懷問民瘼魚服求菽簷虓怒斷鯨鰐宵深
不遑寢一事古今酌孤三卿備九郊藩教胄學燦然鉅典
章萬禩尊嚴確有道字四夸宸居磐石犖日月光門庭關
河白鎖鑰予奪成春秋喜愠關露雹櫛沐誠艱難金湯寶
天作一傳用方黃儒術翊文弱制度改周官桐封背漢約
僉謀專趙括不忍誅晁錯未報吳宮秋皇孫燕來啄十族

魂驚天瓜蔓血盈壑養士三十年報主良諤諤英君自待
邊明堂建龍朔新宮既崢嶸故宮自寥廓新宮北極高故
宮新草綽寶訓蛛絲沈金根苔卧拓呆愚彫翠華楊帷乾
蕙藥陰凝黃屋霜愁灑禁林籜尙念高皇功龍顏儼元幕
溫涼虔鼎俎節候陳精臙醇耐屠蘇睿新糧石泉淪白頭
老中官玉帶花錦褭躬親執掃除啟閉專掌握溝水細涓
涓宮雲淡漠漠彷彿燕支痕隱約爐煙嫋甲子五經過棟
礎半摧剝流寇恣披猖長安燄天焯憂勤十七年社稷死
無作新宮旣淪陷故宮剩榱桷四方摧心肝帝子還飄泊
二三黃髮人憂思席不著田鮑魚菽閒水火殷殷搏黃門
拔劍起外恃羆虎曠中宵策始定縞衣迓素幄百辟朝行
在草創安儉約遂有豫章材湧地就繩削厥惟五色土啟

窖皆型燔于時望宣光萬姓咸呼躍故宮幾興矣黃髮咨
籌度自從貴陽相懷甯牆壁託燕山出總師欽案大翻駭
醜逐劉張徐高姜繼去閣朝綱武臣典密疏瀆且數楚豎
竟指戈妄言君側惡盡撤淮淝兵穴鬪西南角殭屍塞洪
河肝腦江流濁澤清倒戈來天塹一筏縛鎮兵鳥獸散定
南頸貫鏢悄然如無人江山靜濯濯左賢居深帷浴鐵滿
城郭移民安部曲築堵禦侵掠日聞故宮聲丁丁勤斧鑿
一木疲千牛石走萬車腳故宮遂蕩然曠莽馳飛駿誰問
荆棘駝空憐腐草燭歛興垂亡時此理似難覺譬如將燼
施欲燼還一爆舉首瞻故宮故宮成汗澤大哉高皇功廢
興豈關若野人近宮住廿年悲落魄出爲露肘行入不飽
藜藿皇皇喪家狗慄慄入市獲掩涕急前趨蹒跚類羈繳

復見鍾山雲矗矗芙蓉萼映日布靈旗隨風過五柞松栝
雖盡髡意象逾磅礴熒熒龍鳳章未是虎豹韞夜螢羣鳥
驚朝卷千峯燐焜焜金簡書縹緲神仙籥幽蘭終歲芳甘
澗寡洄洄埋金累羸秦秩望匪廬霍六代不敢陵蠟屐名
賢著香埋寶誌棺雨蝕蕭公鏤蒼蒼齊梁寺至今存遺蹕
山貌一朝童山藏萬古橐渾淪元氣中四時備涼燄麥秀
我吞聲髯攀誰冥格疢疾聊咨且慘澹還矜愕吟罷故宮
詩願化鍾山鶴

送徐合素之甘州

陽關西出草蕭蕭長夏焉支雪未消名士兵閒徐孝穆將
軍天上霍嫖姚雲橫赤水調生馬風急黃沙落皂鷗應是
太平無外日翩翩彩筆重題橋

答剡溪瞿菴上人次韻

時事年來不必聞長林片影日懷君齋厨澹泊收黃獨松
壑參差養白雲江上夢迴南浦月天涯人老北山文精藍
近處前賢宅流水淙淙送夕曛

寺近鄒嘉賓宅

雨雪書懷

號風響四檐孤燈耿深夜淙淙雨雪交魂夢嗒焉吃形情
不相識苦樂誰復借鴻濛逢雲將攜手觀元化

安得草草屋數間傍林渚老梅粲前庭修竹蔭後圃置此
易朽軀消磨卽次旅藜藿大布衣幽潛失寒暑日對忘機
人歌呼相我汝不探虎穴腥何必狙公芋老矣志不遂塵
囂當古處

埋憂何地好惟有攝山岑渺渺衣帶水一葦快登臨山僧

虛石塔高士彈素琴泉飛古松顛鐘落寒磻深自然聞見
黜亦使鬚眉森隔江聊悵望恍惚迦陵音

塵壤何茫茫突梯與滑稽君子抱志節齋居筮逢睽操弧
不可張折牙守稗稊長瘖友子光省煩學尸黎蘭莖季虛
谷魚鳥樂迴溪徜徉庶所愜物論誰能齊

十五六行贈玉式

憶昔與君十五六我裏緼袍君奇服相逢各不問苦愁尙
論淵元瞪雙目讀書祇恐後古人著作等身恆不足橫筆
直掃千人廢上朔羲軒下周穆或忌或憐曾莫知快意在
胸心槁木看山卽行數十里一醉三日常不起有司督試
逡巡來西抹東塗薦冠喜自視一第如探囊致君堯舜平
平爾華陽道上攜兩僕二十餘年驢尾秃明遠樓前科跣

行心肝嘔盡劉蕡哭文章既與世變更天地都如浪翻覆
而我安能與之隨汨沒憂從中來不可掬君茹荼我嚼蓼
君搥鼓我擊筑斗酒難澆心曲愁高歌偶當窮途哭當時
豈意賤如此道旁偃蹇避朱紫驕人自昔笑勞人周士安
能學秦士祇合深山大澤披髮掉臂閒游行萬壑松聲滌
心耳綠萼梅千葉杏銀瓶細挽雙鬢靚中秘書萬言策南
朝天子動顏色君所有我所無君較苑我較枯我不問天
天胡爲乎嵩陽玉女峯太華希夸廬一片月萬古居肉芝
紅顏小兒掌石英紺比千芙蓉食之天地壽與俱君若能
來莫趑趄噫嘻君若能來莫趑趄

眞州漁父歌

眞州漁父艇十尺日日維舟汀草碧看盡江南一片山往

來只在菰蘆間短布爲衾囊作枕卧對桃花萬株錦笙歌
響靜羅綺閒明月當頭舉杯飲漁父十年江上漁江上漁
人識面疎有時得魚還自放心同流水歸空虛

余懷字澹心別號鬢持老人莆田人有味外軒橐

詩話澹心留寓金陵著板橋雜記哀感頑豔秦淮花
月爲之增色梅村贈句有云石子岡頭間奏伎瓦官
閣下看盤馬漁洋答其懷古詩云千載秦淮水東流
繞舊京江南戎馬後愁絕庾蘭成一時名流多相推
挹

褚河南書枯樹賦歌爲孝升作

涼飈颯颯山鳥呼丹青滿堂招酒徒煙黃露白木葉下芙
蓉晝泣三千珠主人好客思芳草金鐙玉案供潦倒湖海
風塵濁酒杯江南楊柳新亭道昨夜楓林叫鳳凰朱簾宛
轉明月光庭梧欲作瀟湘雨岩桂先催建業霜牀頭鮫胎

瀉秋水寸絲尺絹雲霞起就中一卷索題詩六朝詞賦初
唐字平生蕭瑟庾子山婆娑枯樹動江關樹猶如此嗟何
及繁絃急管天應泣臨池者誰褚潭州詰倔瘦健拔老湫
銀鈎鐵畫更嫵媚行間自帶英雄氣當時歐虞八法工文
皇睿賞君臣同豈知牝晨亂天紀鬚眉竟向蠻煙徒好書
此賦十本餘漢南搖落增欷歔古人氣韻今人得咨嗟坐
卧忘頭白今宵沈醉太常齋飛箋擘軸皆奇才嗟余坎壈
填溝壑十年夢到屏風腳哀歌夜半風雨來悽愴江潭淚
雙落

和楊炯伯見贈

種瓜何地是青門愁見濛濛八表昏芳草故鄉春閉戶落
花寒食夜開樽荒雞鳴處誰能舞舊燕來時我尙存雨後

不知山徑滑遲君雙屐印苔痕

謝公墩

高卧東山四十年一堂絲竹敗苻堅至今墩下蕭蕭雨猶
唱當時奈何許

孫楚酒樓

江南城西酒樓紅無數楊柳迎春風孫楚去後李白醉千
年不見紫髯公

雨花臺

雨花臺上草青青落日猶銜木末亭一綫長江三里寺千
年鶴唳九秋螢

勞勞亭

蔓草離離朝送客驪駒愁唱新亭陌夜深苦竹啼鷓鴣空

地賦彙言圖卷一
一
簾獨宿頭皆白

登卧龍山

薄暮登山阜寒煙帶雨痕竹梢三里寺桑葉幾家村遠浪
搖江島長蕪入縣門舊時王謝宅今日只啼猿

高樓對酌愴然有思

建業千尊碧不知春復秋平生惟獨往茲夕喜同游天地
心歸處古今人倚樓名山支手板百尺聽江流

遠游詩

衡嶽閒游遇懶殘至今煨芋未曾餐山人何事輕衣紫笑
絕桐江一釣竿

紛紛花柳映沙隄豈有千金購馬蹄痛哭江陵張相國孤
墳猶在洞庭西

一杯江水謝東山賭墅蕭蕭渾是閒莫怪老僧頻捉鼻也
曾譚笑到人間

雨中集飲周忠介公蓼庵與如須懷舊作

雲旗一片繞西臺鐵笛橫吹第幾回茂苑花開堪過日寒
山鐘斷好銜杯雄心視轍收三敗老淚衝河賦八哀悵望
美人臨北渚自騎天馬渡江來

徐延壽字存永閩縣人明諸生有尺木集

詩話存永爲興公之子家鼇峯藏書甚富亂後並田園盡失之客廣陵與漁洋訂交又訪牧齋於拂水山莊牧齋爲序其集謂集中哭曹能始長篇述陽秋詢琬琰富哉古之良史存永尤深推其友許有介詩牧齋並許爲知言

登幔亭峯

孤峯矗雲起千仞何岩巉峯巔平若砥滿地皆靈苗王子

昔張幔曾孫宴通宵千人布瑤席萬丈橫飛橋我來訪奇
跡本爲山靈邀晴雲生杖底咫尺通扶搖俯仰天地窄鶴
馭安能招人間信可哀曲罷風蕭蕭

五老峯後萬松坪

濃翠侵衣冷迴環種萬松中間無別樹前面是何峯林密
遙藏寺山深晚聽鐘半空雲影散青吐五芙蓉

建州符山寺別楚黃樊山圖

共借僧寮一榻眠離家愁說兩經年斷雲古驛過樵水涼
雨孤舟憶楚天千里別情芳草外五更殘夢落花前城南
歌舞今銷歇又見關山月上弦

暮過燕子磯

馮夷吹浪嚙山根雲樹千重暗白門舊壘尙聞雙燕語空

江曾見六龍奔楊花暮雪行人路杜宇春風古帝魂扣柅
中流頻喚酒客情難遣是黃昏

南歸渡揚子

浩浩悲歌擊楫聲瓜州鐙火聚寒城空言天塹分南北不
使中原罷戰爭漂泊孤身衣有淚興亡終古水無聲惟餘
兩點金焦在日見潮痕落又生

霖臣過綠玉齋同克張小飲

柴門雨歇履聲聞徑草春香盡種芸綠醕花前消永晝白
衣天外看浮雲三人入座無殘客終日開窗有此君芳草
不堪懷遠道夢中金虎闔閭墳

法海寺訪空上人

隨身瓢與笠此外更無餘懶補破衣著愛尋貧寺居香厨

三頓粥石榻半牀書日見禪窗下甘蕉日漸疏

高兆字雲客號固齋侯官人明諸生有固齋集

詩話固齋為國初閩中平遠臺十子之一嘗著啟禎宮詞百首搜羅秘密非外臣聞見所及鈔本藏郭兼秋部郎家毛西河游闕與即席賦詩並示所謂曼殊別誌固齋作洗露紅詞弔之詳見西河詩話其荷蘭使船歌作於通市百餘年前鄭荔鄉稱其見微知著可作一篇籌邊策讀非虛謬也

荷蘭使船歌

乙巳冬十月鈴閣日清秘撫軍坐籌邊頗及荷蘭事幕下
盛才賢共請窺其使連騎出城隅江聲來溯溟橫流蔽大
舶望之若山墜千重列樓櫓五色飄幡幟飛廬環木偶層
檻含火器畫革既彌縫丹漆還塗墜叩舷同堅城連鑣足
馳騎佇立望崇高真非東南利某也亦賓客縋藤許登歧
番兒候雀室探首如鬼魅攝衣升及半火攻炫長技煙霧

橫腰合雷電交足至譯使前致詞此其事大義其上容千人方車矧並轡其人各垂手周行若沈思中央置指南樞紐浮天地鐵軸夾其間凌雲百丈植七帆恆並張八風無定吹沓施如網羅坐卧引猿臂下觀空洞底委積於焉寄懸釜熾飲食戴土滋種蒔但可歎博厚安能測遠邃舶師亦國臣逢迎慰臨涖坐我卧榻旁毳毼足明媚雕楹障玻璃懸桁垂白觶發笥云葡萄洗盞注翡翠高瀉成貫珠傳飲勸霑醉銀盤薦瓜蔬風味頗浸漬豈欲傾其釀因之窮審視明明簪筆邊半卷有文字繪事江海跡水道可太備島嶼分微茫山川入詳委觀圖見包藏甯惟一驕恣上馬大橋頭目送增憂喘嗚呼通王貢詎可忘覬伺周防勿遂巡公其戒將吏颺去勢已形禮義不足餌

吳嘉紀字賓賢號野人泰州人有陋軒詩

汪蛟門曰野人家泰州之安豐場閉門窮居蓬蒿土
 室名所居曰陋軒終日把一卷苦吟自娛晚年善病
 或并日一食近海多暴風疾雨水涌數丈鹵地為魚
 場人絕粒動稱凶年野人盧舍汗窪每歲水至常及
 半扉井竈盡塌苦吟不輟其為詩工為嚴冷危苦之
 詞所撰今樂府尤淒急幽奧皆變通陳跡自為一宗
 近代巖棲之作鮮有過之者沈歸愚曰漁洋詩以
 學問勝運用典實而胸有鑪冶故多多益善而不見
 痕跡陋軒詩以性情勝不須典實而
 胸無渣滓語語真樸而益見空靈
 詩話國初詩家有以質樸勝者杜茶村孫豹人及陋
 軒皆是陋軒閉門覓句絕依傍謝文飾戛戛獨造精
 曠道上要不失為邢石曰潘南村一流人漁洋火熱
 之嘲固非定論潘四農盛為稱許與亭林並論亦未
 免推崇稍過也

吾廬

吾廬清谿中年久半傾圯圯者不復問存者還欲倚老梅
 共橫斜撐拒臨流水有客念傾頽贈糧令葺理負戴駭鄰

人升斗分匠氏仍缺石與木來朝賣一豕力作何紛紜癡
兒間老婢窗牖次第明巷徑復委委家人意頗貪指點舊
基址迺欲典衣裳更求廣居止微笑謂家人戶外寒方始
且留此隙地以待春風起我自荷一鋤種菜柴門裏

送人歸黃山

入雲山路碧重重歸去追隨石戶農幾畝秫田今有主一
間茅屋在何峯煙崖芝草衰年採雪嶺人樵落日逢悵望
浮邱蹤跡遠鍊丹臺上倚青松

僻壤

僻壤無春至安知春已殘海雲千里黑塞雁一聲寒老去
謀生拙時危作客難直西是鄉路日日出門看

內人生日

潦倒邱園二十秋親炊葵藿慰余愁絕無暇日臨青鏡頻
過凶年到白頭海氣荒涼門有燕谿光搖蕩屋如舟不能
沽酒持相祝依舊歸來向爾謀

玉鉤斜

莫歎他鄉死君王也不歸年年野棠樹花在路傍飛

新僕

語少身初賤魂傷家驟離飢寒今已免力役竟忘疲前輩
親難愜新名答尙疑猶然是人子過小莫愁答

送王黃湄之海陵

是我還家路扁舟汝獨行千人初短氣去國各含情海水
孤城暗霜風一雁鳴此鄉稱僻壤誰更識虞卿

送程翼士

出城江水大雨歇開夕陽程生攜妻子歸去東臺場輕舟
入浦煙風起芙蓉香去者方愉悅送者忽徬徨宿昔舊茅
屋與君同一鄉海潮漂里巷親友半流亡家有卧病妻秋
月夜正長蕩子貧不返望望涕霑裳

夜發

田家夜收稻吾亦適江關燈火遠相映去留俱不閒水暄
仙女廟月上謝公灣一路饒風景扁舟任往還

辛亥孟夏二十八日三兄嘉經歸葬東陶

二兄呼五弟荷鋤隨我發爾我將老死應收三弟骨行行
見廢墟荆棘何翳鬱飢鳶啄狸貉野蔓牽人膝二十八年
來始有家人跡朽櫬在何處形骸雜土木肢體拾容易砂
礫亂爪脊撥剔到天暝全軀乃無缺嗚呼甲申歲兄禍生

倉卒身飽強橫手命盡少壯日官長來相視行路色慘戚
磊磊讐人頭指日白刃割哀笳忽四起鐵騎來萬匹野積
戰士屍城流殺人血羣兇出獄門亦各操鈇鉞依倚猛虎
區見者咸竦慄飲恨歸去來待時卧蓬蓽次男名瑤琴襁
褓兄愛惜眾謀立爲嗣此支庶不歇四歲離所生命仰伯
母活不悟大人心憐女不憐姪綺襦擁外孫兒也足無襪
弱膚受風霜凝髮叢蟻蝨憊極走還歸持抱生母泣我時
實貧窘寸心與誰說今年兒齒壯摧殘膺疾疾媒妁不議
婚徭役長被責敢望吾宗大仍愁兄祀絕冤魂久飄零今
日就窀穸夔夔鄉樹近沃沃水菱碧死者抱痛眠生者吞
聲哭報讐事已矣斜陽徧阡陌

送江健六之長洲錢塘

長歌去路遙遙去何處楓橋與斷橋兩岸梅花五更月
布帆吹去風條條嘯傲山水前豈遂稱豪賢豪賢舉動笑
腐儒飲酒縱博膽氣麤朝出赴急難夜歸提頭顱一日功
成不受報有時義在仍捐軀不然潛生至老死結屋種樹
臨江湖雨晴放艇隨漁父客散分餐餉鶴雛君不見吳要
離宋林逋

吳蒼遠邀過野竹居

老叟賣茶處麥田飛野雞籬邊江岫近屋後竹林低過雨
陰如水聞雷笋出泥山泉煎欲熟入座聽鶯囀

舟中寄懷吳去疑

不見江南人遙望江南雲後雲氣光晶前雲行逡巡逡巡
行復止依依如戀羣物態有如此余益思故人夕風吹浦

淑野色迷我津鳧鷺各有類孤舟欲誰親
唯有楓林下潮聲漸漸聞

寄答席允叔

淮濱海浦路迢遙記得蘭舟繫板橋
多少離憂人不見鳩鳴桑柘雨瀟瀟

我昔

我昔客途逢敗兵弓弦旆影風秋鳴
殘騎如狼散草莽居人雜免奔縱
橫漁船貪利夜賣渡金大乃許載人
去暝色潛行曙則隱口乾腸飢我能忍

我昔攜家亟逃難海雲靄靄晝昏冥
野空蹄響賊馬近我船欲速行轉慢
須臾燔燒閭里紅風漂船入蘆港中
蘆葉菰葉蔽男婦引衣掩塞啼兒口

我昔兵過獨還家
畦上髑髏多似瓜
鴨毛滿蹊舊狗死
籬菊自放霜中花
天南伯兄天北季
驚魂棄絕故園地
又聞土賊聚稍稍
細雨夜啼九頭鳥

卒歲

履冰返故里
倦身獲稍閒
村墟多積雪
凜凜生暮寒
烏鵲亦懷栖
各認舊林還
車轍復誰顧
詩書聊自看
維廬則有堵
維井則有幹
老年逢卒歲
布褐無一端
晚暉檐下來
梅影落我冠
家人進簞豆
肘見容色歡
借問何爲爾
門外追呼寬

夜發

客意急前路
中宵刺小舟
寒潮隨棹去
明月有聲流
襆被裏諸子
夢魂圍一愁
雞鳴霜滿岸
莫辨古揚州

陶澂字季深一字季號昭萬寶應人有湖邊草堂集舟

車集

詩話陶季晚為一字字好游足跡半天下詩多於舟車得之因名舟車集才鋒踔厲筆勢聳突凌紙突兀而起集中有擬少陵二吏三別諸篇蓋當明季民窮政亂感憤既深不得不作變徵之聲也

游香巖寺

取適向林麓漸聞花氣香沮洳細路側宛轉臨春陽諸峯
紛來前杖策依重岡俯視見虎跡殷憂何能忘同懷二三
人為我攜酒漿念茲最初地努力風磴長
披榛造幽微轉側信險絕天風振衣袂陰磳依冰雪苔生
佛堂下淨影映眉睫山僧歸無期晨夕梵唄缺吁嗟末法
法象教殊未滅何人開冥蒙特具廣長舌

泛舟經岳陽長沙

春江北流日西匿繫景割波留不得道傍赤岸今爲墟霸
業何人更相憶昨宵急雨來自東巴陵遠樹煙空濛湘娥
染黛幾千歲朝暮只臨明鏡中柳生井邊沒芳草依然昔
日相逢道音沈響逝天茫茫愁見白波吹浩漾船旗不定
南風旋寂寞一聲聞杜鵑

黃蘆岸側黃陵下雨溼天低水交瀉靈旗暗逐往來風人
間那識蒼梧野傾心奉君無二心撫絃斷絕悲人琴相望
不盡淚中血零落可知湘水深湘東更有蒙讒客憔悴于
年滯冤魄

寒星搖搖天上明迴環下應十二城洞陽石乳皆雲英有
人餌之蹈日行日邊淵旋城下水可憐蕩景春山是嶽靈
南去千萬里青霞一片飛初起舊寺銷亡今幾年螺書秘

記鴻蒙篇陰蟲古苔蝕不盡六丁夜護蛟龍纏蒼筤谷口
雲氣鮮此中歲月容高眠

登恆山

恆陽地與塞垣通山脈紆迴指大同黑霧不消陰礪雪翠
微時下石壇風燔柴有制存周典持節無人出漢宮幽縹
嶽靈何所寄巋然碑版覆苔紅
不盡浮雲起北隅離離城郭望中孤荒原白草還今古戰
骨青燐半有無委伏萬山連抱犢嶺岷一道隱飛狐憑高
莫問探符事昔日羸秦亦已徂

故宮詞

慈甯宮禁老莓苔元日驚傳法從來上下隔簾遙拜畢六
龍飛輅一時回

龔賢又名豈賢字半千又字野遺號柴丈江甯人有半

畝園詩草

詩話半千性孤僻與人落落難合畫山水沈鬱蒼莽獨出幽異古法爲一變揮灑餘暇賦詩自適

扁舟

扁舟當曉發沙岸杳然空人語蠻煙外雞鳴海色中短衣
曾去國白首尙飄蓬不讀荆軻傳羞爲一劍雄

飲徐氏園

春來無此日午過尙如朝水氣亭三面城陰柳半腰清歌
連白舫長笛隔紅橋最是歡娛地年華覺易消

晚出燕子磯東下

江天忽無際一舸在中流遠岫已將沒夕陽猶未收自憐
爲客慣轉覺到家愁別酒初醒處蒼煙下白鷗

程邃字穆倩號垢區江甯籍歙縣人明諸生康熙己未

舉博學鴻詞不就試有會心吟

詩話穆倩詩畫篆刻皆夏夏獨造倪闇公稱其詩如出郭篇云焦飯空懷哺奇温竟御縣除夕書壁云帝王輕過眼宇宙是何鄉以為骨懷結曲不減少陵

從龔孝升先生聯船淮陰赴司馬理頥公招

元禮陳賓盛誰方雪夜舟相思千里駕吟弄五湖流分食
通心醉颺帆療客愁景移雲日好動息一江鷗

過萬年少隰西草堂

值得漁夫擢江梅隱雪津黃河冰腹厚白草馬蹄春既釋
隆中業還為川上人友生難解事往行不須論

戴本孝字務旃別號鷹阿山樵和州人有前生餘生詩

稟

詩話務旃父敬夫明湖州推官甲申後遜跡不出故
務旃及弟無忝竝以布衣終務旃詩畫皆有名漁洋
稱其性情高曠嘗在京師與友談華山之勝晨起卽
襍被往游漁洋贈詩云捫蝨雄談事等閒餘情盤礴
寫孱顏洛陽貨畚無人問五月騎驢
入華山無忝四十不娶詩亦有家風

自題畫詩

叢薄何翦蕨喬木無餘陰斧斤向天地悲風摧我心不知
時榮者何以答高深

燔柴今已廢岳靈杳何託白雲來洗崖有額爲誰跼濤聲
聽松崩響逐龍湫落

何處無深山但恐俗難免一心溯真源千載不卷轉扁舟
弄桃花此興自不淺

草木亦爭榮攀援與依附凌霄桑寄生滋蔓尙可懼惜哉
不防微良材化枯樹

坐愛柴扉外林陰滿釣竿葭昏煙棹溼谿落水春殘不是
滄波客前津問好難

田家 集陶

少無適俗韻甘以辭華軒但道桑麻長而無車馬喧服勤
盡歲月守拙歸園田終曉不能靜雞鳴桑樹顛

戴移孝字無忝和州人

石城樂

雙槳渡桃葉隨歡望夫磯催送來秋浦夜夜聽猿啼
雨落不上天瓶墜已入井還歡金錯刀割斷轆轤綆

方文又名一來字爾止一字明農桐城人明諸生有翁

山集

鄭則厚曰爾止詩陶怡性靈流
連景物不屑爲章綺句繪之學

詩話爾止以己王子生情武林戴葭湄作四王子圖
中為陶淵明次杜子美次白樂天皆高坐而已偃樓
於前呈其詩卷錢湘靈題龔山續集云王子同年作
者同陶公杜公與白公若修歲譜兼詩譜又記龔山
江以東又近來詩卷擅千秋櫟下官高爾止游何事
同生王子歲竟無一字學崔劉自注周櫟園侍郎與
爾止俱王子亦王子白香山詩云何事同生王子
歲老於崔相及劉郎案淵明生晉興甯乙丑子美魯
豈詩譜謂生於先天元年王子蓋沿呂汲公之舊趙
子櫟年譜謂生於開元元年癸丑是淵明並非生王
子子美之王子亦尚有
異議葉調生辨之纂詳

單質生見訪僧舍并惠三忠集畲此

高樹引秋蟬空梁逝春燕昨宵微雨集重陰滿僧院之子
一來過羈人共談讌秀采本淪漪腴詞復菁蒨內秉金石
姿匪直情婉變稽古式芳躅懷忠耿遐眷下上漢宋書獨
愴武侯傳煩冤痛鵬舉軾軻欽履善流覽未及終風微宛
可見汨余有同心參差淚如霰

癸卯三月十九日潤州客舍同潘江如小飲述懷四

十韻

與君定交初乃在乙酉春是時楊貴竹開府京江濱其性
頗好客客來多俊民史邢暨萬宋才華更清新日夕造君
廬披豁任天真君尤篤愛我相對但含顰私憂南國亂汲
汲謀隱淪遙指鶯脰湖水鄉風俗淳從無兵燹患樂彼漁
樵人三月十九日先皇之忌辰同登北顧山仰首號蒼旻
野老或見憐朝士反見嗔俄而江北岸鼓角聲振振君先
挈妻子湖村依所親我亦攜小婦追隨爲比鄰此地旣幽
僻可以長垂綸君復有遠圖舍我游越閩三歲始歸來道
路罹百屯我適無所爲賣卜潤城闔一見喜欲狂茅屋共
宵晨曾將賣卜錢買酒醉千巡無何江上別東西各風塵

彈指十二年迴若吳與秦己亥黃河邊邂逅疑有神因過
范生宅連牀話經旬贈答非一篇相期保松筠別後又五
載聞君家益貧田園被侵奪賦稅猶在身寄居荒山中妻
子行負薪癸卯春三月京江重問津維舟卽相訪奇窮果
無倫顛毛種種白顏面黑且敝破帽與敝衣何減百結鶉
况當十九日言之鼻酸辛仍往北顧山亂石迷荆榛旅人
不敢上一慟何繇申是夕返我寓呼童采江蘋取酒酌燈
前心曲難具陳回思廿年事惘如夢中因夜半作此詩龍
鍾淚沾巾

韓侯兒

韓侯之族世所悲韓侯有兒人莫知我今痛飲淮陰市請
爲君歌韓侯兒侯昔鍾室銜冤日小兒三歲誰能匿有客

此日余言區外一ノ
三ノ
毅然竊負逃密以情探蕭相國相國聞之驚且憂爲言關
隴不可留作書授客使入海南粵趙佗堪與謀趙佗夙與
蕭韓善養兒成人延一綫去韓之半改姓韋子孫漸繁滿
鄉縣因之世世爲土官魏晉以後休隱瞞蕭相前書趙王
冊刻諸金石永不刊韓襄毅公會有說乍聞此事歎奇絕
其客姓名雖不傳自與程嬰比風烈釣臺之下淮水奔我
來泊舟先愴魂千古英雄有本色死生貴賤何足論要知
呂亡漢亦滅韓侯血食至今存

贈湯巖夫

今人讀書不識字下筆淆譌十三四許徐訓詁自分明爭
奈人都不省視昔者吾友戴敬夫磨礱字學天下無予少
竊聞其緒論雖知梗概心猶麤中年奉教蕭尺木尺木篆

隸精且熟每與予言輒終夜字學稍知其節目平生結交
多俊民此道茫昧恆失真何期晚遇湯元翼奄有二子成
三人猶記魯江同作客頗領微言恨匆迫別來十載夢魂
勞老去重逢鬚鬢白閒時緩步過吾廬相對惟應話六書
秦漢晉唐體多變那能貫穿爲發攄當時戴蕭所未悉今
日詢君得其實我亦著書曰蒙求乞君釐正方成帙

桃花潭短歌

桃花潭中春水深桃花潭上春雲陰雲陰不見古人面水
深曾照古人心如何李白汪倫後雲水荒涼直至今

題屈翁山詩集

周南存漢廣誰謂楚無風爾祖離騷賦人言小雅同本支
猶未墜菘苑復稱雄千古沅湘意今歸五嶺東

送朱子葆歸嘉興

孤飛越鳥戀南枝
白草黃花客去遲
小閣共眠秋雨夜
危檣獨掛曉霜時
狂歌一曲愁先結
痛飲千鍾醉莫辭
門外江風復江水
解維何處寄相思

喜槁木師至

聞君春到石頭城
將妾和兒贈友生
此事太奇終有悔
天恩難斷可無情
既歸白業家何定
欲返黃州路未平
江上故人多古義
東郊應與結茅成

上雲居山

雲居去地三千丈
縹緲眞爲雲所居
卻訝峯頭多畝澮
宛然天半一村墟
梅檀况有神宗筆
貝葉曾分御府書
僧老不知陵谷變
向人猶說舊皇輿

寒食日飲酒家

江東又是禁煙節郭北無非上塚人久客未歸緣世難舊
交相見獨情親水邊亭榭多春酒花下衣冠剩逸民不分
青青垂柳色欺吾斑鬢漸如銀

夜坐

殘暑不成眠一夜長數起山深月色高坐看松陰徙

丁之賢字德舉建甯人有丁布衣詩鈔

詩話德舉生明季嘗挾策走京師西游秦中久之南
還復出佐戎幕居停主人稍稍資給之贈以婢海蠻
乃還居桃花溪上不復出詩與朱
國漢為章合刻為綏安兩布衣集

曉度沙苑懷華州諸社

茅屋晨雞早征驂背華城平沙含月迴遠火雜星明地瘠
人煙冷山空落葉鳴淒然懷舊社回首曉雲生

暮春新霽王瀛州楊海鶴張信我見訪

曉氣嵐光欲溼衣柴門獨立趁晴暉
桑林風暝鳩聲急芹徑泥融燕影微
半畝綠陰憐樹合一簾紅雨惜花飛
頽然拚醉鄰家酒稚子新挑菜甲肥

高國定字一甫古田人明貢生有雪濤集

西山

流風迴雪掩晴沙寒擁西山處士家
前路曦微消不盡有人踏去問梅花

季步駒字子尾號尾孫無爲人明諸生有懶蠶居士遺

橐

秋夜

屋角隱晴月雨葉含金光空堂虛無人
蟋蟀鳴長廊露草

委砌亂竹風虛檐涼秋色已不淺菊英猶未芳美人惜時
景深夜徒慨慷搔首久延佇薄寒生衣裳深意不可道誰
能慰中腸安得騎黃鵠相攜游巫陽

送戴知仲先生還休甯

一種鑄人心慙懃忘耄耄微言證未瑩乃作兩鄉別秋花
伴還轅紅葉綴山嶼去來無心雲卽境亦可悅小子澹塵
緣游懷半生結力耕待兒長訪道識英傑追隨白岳巔茹
芝玩松雪

秋

萬物皆欲靜節其繁與浮枯藤懸敗壁野水打孤洲竹座
如僧對家居似客游重陽風雨近老此一村秋

閉戶

地耳卷言圖卷一
三
黃金閒不得白髮自然侵機淺藏山固交窮見道深雖無
投轄客卻遂著書心惟與家童約僧來月下吟

秋晚飲鍾五柳園林子孟限韻

時事薄黃虞糟邱聊與娛秋花成密幄夜席負高嶠妄夢
如驚柝詞名已濫竽殷勤今夕酒爲爾滯行鞫

曩昔

痛飲豪吟懷曩昔只今高興總蕭然笙歌漫記歡娛處朋
好皆非少壯年酒量淺於經旱瀨詩情疏似後秋蟬拋書
獨向階前立閒看晴雲蕩碧天

張度字齡若晚號獅厓桐城人有蟋蟀窩集

詩話獅厓生明季入國朝棄舉業專事吟咏同里姚
端恪公爲諸生時延課長子後五子二女皆從學二
十餘年獅厓終身不
他就蓋隱於教授者

重過惠應寺

來尋招隱地野趣足盤桓怪石支茶臼幽藤補藥欄清秋
林響靜長晝葛衫寒未識浮生理飯依問懶殘
竹色干霄直閒房開翠微人穿蘿薜徑僧製芰荷衣籬果
隨時落溪雲傍晚歸愧非元度逸常得息塵機

過陳二如讀書處

碧山棲止著元經來叩柴門半啟扁嵐氣溼衣庭際落泉
聲繞屐竹中聽素琴常挂同元亮木榻將穿似管甯日暮
空林猿鳥散卧看明月上松樞

唐允甲字祖命宣城人有耕塢山人詩集

詩話祖命善書法明季嘗爲
中書鼎革後隱居不復出

題朱石者半水園次李梅公韻

窈窕仙源何處尋
藍田花雨抱雲深
相招勝侶馴蒼鶴
獨浣煩襟對遠岑
灌木夏涼千樹夕
芰荷秋老一池陰
浪浪欲洗羅浮夢
物外閒心恣短吟

追餞路可期不及

習池舊侶已蕭蕭
空返山陰雪夜舸
郭泰亭中知跡少
袁宏江上有人招
青簾翠篠封蛛網
細雨疎鐘夢鹿蕉
歸去故山高處卧
月明十里聽吹簫

余紹祉字子疇婺源人明諸生有晚聞堂集

詩話子疇內行修篤天啟中補博士弟子員師浮梁黃中
介尚寶龍光兼朱陸之學築室田間號疑庵居士甲申後易僧服入高湖山更名大疑自營壽藏題明布衣疑庵余子又自爲文以識之

飲于昭姪樸園

天下遂如此
人間適志難
况逢花事在
忍使酒杯乾
樹色

有餘綠泉聲作意寒可憐今夜月幾處醉顏看

寄懷吳君玉學博兼致壽意

春光仍自上疏簾憂國懷賢獨黯然無計可支同火宅有人如此尙寒壇
斬新甲子從頭起依舊河山在眼前試問白門諸大老弓旌應到阿誰邊

崔冕字貢收又字九玉號素庵巢縣人有素吟集

詩話九玉爲明遺民游南北名勝畧編亦工畫作樹不著根蓋用鄭所南畫蘭例也

過含山漁巘口昔避亂居此

天淨秋無際峯尖日出圓人爭投市米鳥破下林煙紅葉
高低路黃花大小田依稀村入畫坐卧十年前

乃吾廬

主人兩鬢已如絲懶拙生原太戾時散髮嗣宗非玩世嘔

心長吉只耽詩青山寫換荒年米黃絹裁成幼婦詞太息
生存零落句不貪華屋厭茅茨

晚晴簃詩匯卷十六終